

摘藻堂四庫全書薈要

集部

欽定四庫全書薈要卷一萬三千九百八十四集部

白氏長慶集卷五十四

唐白居易撰

翰林制誥一

擬制附○凡三十四道

除裴垍中書侍郎同平章事制

門下朕聞后德惟哲臣德惟良在太宗時實有房杜贊
貞觀之業在玄宗時實有姚宋輔開元之化咸克佑我
烈祖格於皇天朕祇奉丕圖懋繼前烈思欲貞百度和

萬邦建中于人垂拱而理永惟房宋之化寤寐求思至誠感通上帝眷祐果賴良弼輔予一人正議大夫行尚書戶部侍郎上柱國賜紫金魚袋裴珣器得天爵文為國華行有根源詞無枝葉忠敬恭順貫之以誠心方潔貞廉輔之以通識玉立不倚金扣有聲洎內掌綸言密叅樞務嚴重有大臣之體溫雅秉君子之文每獻納之時動有直氣當顧問之際言無隱情遠圖是經大事能斷匡予不逮時乃之功及領地官且司邦賦會計務劇

出納事殷投利刃而皆虛委焚絲而必理歷試已久全
才益彰宜登中樞以副僉望夫宰輔者下執邦柄上代
天工為國著龜注人耳目爾尚降乃德以親百姓廣乃
志以序九流匡朕心以清化源從人欲以致和氣予欲
宣力汝為股肱予欲詢謀汝為心膂予違望于汝弼勿
謂不從汝言逆于朕心必求諸道獨立勿懼直躬而行
明聽斯言敬踐乃位嗚呼罔俾房宋專美于前可中書
侍郎同中書門下平章事散官勲賜如故主者施行

除段祐檢校兵部尚書右神策軍大將軍制

門下為君之心惟功勞是念有國之典以賞勸為先其
有輯睦師徒保綏黎庶盡勤王之節建護塞之勲則宜
進以官常委之軍要兼文武之秩叅內外之榮斯所以
彰念功而明懋賞也四鎮北庭行軍兼涇原等州節度
支度營田觀察處置等使光祿大夫檢校工部尚書使
持節涇州諸軍事涇州刺史兼御史大夫上柱國鴈門
郡開國公段祐早膺事任累著公忠名因義聞位以勤

致自分戎閫實控塞門明舉武經大修邊務士卒有勇
保障無虞虜不近邊農皆狎野展執珪之勤禮瀝戀闕
之深誠方圖爾勞且遂其志夫六官庀普弭切職大司馬
列于前二翼分師上將軍處其右長夏官以率屬領環
衛而拱宸苟非信臣安可兼委嘉乃實劾副予虛求將
慎重其腹心宜進登於喉舌敬服休命勉揚令圖可檢
校兵部尚書右神策軍大將軍知軍事散官勲封如故
主者施行

除趙昌檢校吏部尚書兼太子賓客制

門下王者以尚齒尊賢為禮以念功任舊為心況文武
之才有以兼備則中外之職所宜迭居所以寵舊勲而
優耆德者也前荆南節度管内支度營田觀察處置等
使金紫光祿大夫檢校兵部尚書兼江陵尹上柱國天
水郡開國公趙昌聚學飾身修誠致用久膺事任累著
勲猷統護交州威惠之聲克振鎮臨南海撫循之政有
經自移部荆門馳心魏闕增修職貢益勵忠勤爰舉寵

章用旌茂績夫望優四皓然後能調護春闈才冠六卿
然後能紀綱會府惟爾年德足尚可以周旋其間宜增
喉舌之榮以崇羽翼之任服我休命其惟懋哉可檢校
吏部尚書兼太子賓客散官勳封如故主者施行

除鄭綱太子賓客制

門下王者重輔弼之任明進退之宜見可即升知否則
捨茲朕所以推誠不惑與物無私者也銀青光祿大夫
守門下侍郎同中書門下平章事兼弘文館大學士上

柱國陽武縣開國侯鄭綱早以令聞入叅禁署永惟勤績出授台司期爾有終匡予不逮歲月滋久謀猷寔微罔清淨以慎身每因循而保位既乖素履且鬱皇猷宜副羣情罷茲樞務朕以其久居內職累事先朝思厚大臣貴全終始俾就優閒之秩用申寬大之恩可太子賓客散官勲封如故主者施行

加程執恭檢校尚書右僕射制

門下職叅揆務權總戎麾必惟其人乃授斯柄自非望

崇垣翰功著旂常則何以副儀形之求稱節制之任我
有休命爾其敬承銀青光祿大夫檢校兵部尚書使持
節滄州諸軍事兼滄州刺史御史大夫橫海軍節度支
度營田滄景等州管內觀察處置等使上柱國邢國公
食邑三千戶程執恭義勇立身忠慤成性聚為事業發
為勲猷歷事先朝久專外閫殿邦而山岳比鎮奉國而
金石為心動修武經居有循化洎執珪入覲班瑞言旋
忠懇內激於心誠恭順外形於詞氣爰舉疇庸之典稍

增命秩之榮方圖前勞且有後命朕思安封域望在勲
賢任既切於腹心位猶輕於喉舌以守土勤王之効雖
進官封念來朝述職之忠未加寵數特升右揆俾在中
樞勉終永圖無替成績可檢校右僕射餘並如故

除王似

薄密切

檢校戶部尚書充靈鹽節度使制

四年六月
十三日進

門下靜邊之要選將為先夫有統馭之才然後授以節
制之任有撫備之畧然後鎮以夷夏之衝期乎攘遏寇

虞慎固封域今予命爾時謂得人開府儀同三司檢校
刑部尚書兼右衛上將軍寧塞郡王食實封二百五十
戶王似忠厚立誠果斷効用慎始終而行有枝葉踐夷
險而道無磷緇早練武經果從軍職頃逢多壘實佐元
戎節著臨危功叅定難位由勞致名以忠聞自列六卿
且司七萃星霜屢變金石彌堅宜申命於北轅俾遏戎
於南牧進地官以崇新命極勲秩以褒舊功中簡朕心
外諧僉議况五原重鎮諸夏長城修戎政莫先於威聲

牧邊民莫尚於惠實師雜昆夷之悍訓必在和地為獯
虜之隣撫宜以信勉率是道往分朕憂歲時之閒期於
報政委望斯在爾其聽之可檢校戶部尚書兼靈州大
都督府長史御史大夫充朔方靈鹽定遠城節度使知
節度事管內支度營田觀察處置押蕃落等使仍賜上
柱國散官實封並如故主者施行

除閻巨源充邠寧節度使制

四年十月
十一日進

門下華夷要地實為蕃漢鈇鉞重柄必授忠賢況乎倚

角諸軍金湯中夏有坐甲護邊之旅任切於拊循有引
弓犯塞之虞寄深於備禦內作心腹外張爪牙苟非信
臣不在茲選奉天定難功臣開府儀同三司檢校尚書
右僕射兼羽林軍統軍御史大夫上柱國定襄郡王食
邑一千三百戶閻巨源備知虜態明練兵符永惟頗牧
之能宜授郇須倫切郇之寄長南宮而遷左揆壯西郊而
委中權既圖前勞且佇來効於戲千聯之帥可以觀政
萬夫之長可以樹勲勉弘令猷副我休命可檢校尚書

左僕射使持節邠州諸軍事兼邠州刺史御史大夫充
邠寧慶等州節度管内支度營田觀察處置等使功臣
散官勲封並如故主者施行

授吳少陽淮西節度留後制

三月十九日

門下議事以制擇善而行是適變通庶臻康濟此王者
所以弘德而息人也况閫外重寄准右成師建有德以
統藩方擢有才以領留府仰惟令典今舉行之彰義軍
馬軍先鋒兵馬使正議大夫檢校右散騎常侍使持節

申州諸軍事申州刺史兼御史大夫會稽郡王吳少陽
忠勞許國貴介成家蓄武畧於韜鈴宣吏能於符竹屬
元戎既歿謀帥其難朕將選衆以升試可而用推掌戎
務已逾歲時而能和輯師人勤修土貢布寬簡有恒之
政動悅人情守恭順不踰之心靜俟君命有嘉大節可
假中權宜進列於貂蟬俾增威於貔武仍加勲秩式茂
寵章嗚呼重觀其能我故委之留事載佇其効爾宜勉
於後圖敬思是言往率乃職可銀青光祿大夫檢校左

散騎常侍依前兼御史大夫使持節蔡州諸軍事權知
蔡州刺史充彰義軍節度管內支度營田申光蔡等州
觀察處置等使留後仍賜上柱國封如故主者施行

除程執恭檢校右僕射制

七月十二
日夜進

門下臣之節極乎忠功君之柄先乎爵賞欲忠者之克
懋也故爵有加等欲功者之速勸也故賞不逾時古先
哲王實用茲道今我命爾因其舊章橫海軍節度支度
營田滄景等州觀察處置等使起復冠軍大將軍左金

吾衛大將軍員外置同正員檢校兵部尚書使持節滄
州諸軍事兼滄州刺史御史大夫上柱國邢國公程執
恭業傳將畧名在勲籍蘊天爵以修已忠孝兩全竭臣
節而事君夷險一致紀綱我列郡節制我成師動揚休
聲靜著茂實自合符徵旅奔命出疆暴露歷於三時供
億出於二郡整衆而身作師律伐謀而心為戰鋒服金
革而無辭當矢石而有勇雨晦識雞鳴之信風高見隼
擊之威遠略既申茂勲方集朕以恒陽之衆蠢爾無知

毆彼生人致之死地每一念至惻然久之與其傷和而
濟功曷若含垢而修德既罷師旅爰圖勤勞効且居多
賞宜從重俾自夏官之長特升右揆之崇獎忠勸功於
是乎在承我休命爾其欽哉可檢校尚書右僕射餘並
如故主者施行

除郎官分牧諸州制

漢宣帝云與我共理者其惟良二千石乎誠哉是言朕
每三復安得循吏副吾此心今之臺郎一時妙選嘗經

任歷率有才用雖典曹庀

普弭切

事其務非輕而卹隱分

憂所寄尤重是用並命分牧吾人歲時之間期於報政

戶部郎中某可某州刺史兵部員外郎某可某州刺史

云

云

朕高懸爵賞佇期酬効咨爾夙夜其念之哉無俾

龔黃專美前代

除張弘靖門下侍郎平章事制

夫佐佑天子變理陰陽平章法度登進賢哲外撫夷狄
內安元元使百官修其職一物不失其所此宰相之任

也朕思得良弼馴致此道咨予命汝其殆庶乎某官張
弘靖惟乃祖乃父代居相位咸有成績書于旂常爾有
忠正恭肅文以禮樂日濟其美振揚家聲一時之人謂
之才子亟登清貴益著令聞洎出刺陝部移鎮蒲坂政
不苛細甚得人心寮吏將卒皆樂為用清簡之化聞於
京師由是鄭風緇衣之好漢庭玄成之美朝望時議翕
然與之人謀既同朕志亦定乃用登爾于佐輔授爾以
大政尚克欽乃嘉命業乃代官竭其股肱服我前訓鳴

呼三代為相邦家之光爾其念哉無替乃前人之徽烈
授范希朝京西都統制

閭闔風至太白星高謀帥護邊國之大計某官范希朝
忠貞勤儉以為質惠和智勇以為用一代名將三朝信
臣朕以西邊列鎮三四若有總統則易成功思得良帥
有威名者并護諸將歲一巡邊乘秋順令揚其威武則
南牧之馬引弓之人知我有備不戰而去誰可任者無
如希朝以爾有朔方之勞有振武之効功在疆場

刑狄切

名聞羌戎惟實與聲皆副是選今拜爾為大將尊爾為
司徒節制進退一令諮稟倚望如右可不慎與可充京
西都統

贈吉甫先父官并與一子官制

敕某官李吉甫出入將相迨今七載而能修庶職叙彛
倫毗予一人以底于道夙夜不怠厥功茂焉夫忠於君
者教本於親寵其身者賞延於嗣於是乎有飾終之命
有任子之恩所以感人心而勸臣節也惟茲舊典可舉

而行

除李絳平章事制

昔在堯舜聰明文思尚賴良臣實相以濟况朕薄德不逮先王是用急疾於求賢置之於左右俾承弼納誨以匡不逮言雖逆耳必求諸道事苟利人咸可其奏茲足以宣股肱之力成天下之務歷選多士爰得良輔乃降厥命其聽之哉某官李絳齋莊嚴重內明外直進退舉措有大臣體自叅內職每備顧問忠讜之操終然不渝

及貳地官專領財賦未逾周月亦有成績歷試多可人
望攸歸俾登中樞無易絳者於戲爾以文學入仕以正
直奉上才膺大用職亦屢遷十年之間位至丞相可以
報國在乎匪躬欽哉懋哉無忝朕命

授韓弘許國公實封制

梁宋之交水陸合會人雜難理軍暴難戢因變肆亂往
往有焉唯此一方朕常憂慮今有良帥鎮而撫之政立
功成宜舉賞典某官韓弘以長材大略作我藩臣本於

忠力輔以政理自分閫寄在浚之郊嚴貞師律恭守朝
憲訓兵積粟明罰信賞軍和食足禮節並行河南晏如
于茲一紀是則有大勲於國有大惠於人會課議功無
出其右夫有過人之効則有加等之命古之王者所以
賞一人而天下勸者用此道也可不務乎是用建于上
公授之真食以示殊寵以旌殊績欽我休命子孫其保
之

除裴度中書舍人制

司勳郎中知制誥裴度以茂學懿文潤色訓誥體要典麗甚得其宜施之四方朕命惟允况中立不倚道直氣平介然風規有光近侍臺郎滿歲班列當遷綸閣之職所宜真授

除蕭俛起居舍人制

左補闕翰林學士蕭俛頃居諫列職同其憂夙夜孜孜拾遺左右朕嘉乃志選在內庭自叅密近益見忠謹始終不替尤足多之記事之官一時清選俾膺是命以弘

勸獎

除崔羣中書舍人制

庫部郎中知制誥翰林學士崔羣端厚和敏飾以文學
溫溫忠敬得侍臣之風自列內朝兼司誥命事煩而益
密職久而彌精六年于茲勤亦至矣况小大之事常所
訪問盡規極慮弘益居多所宜寵以正名式光禁職敬
乃嘉命其惟有終

獨孤郁守本官知制誥制

考功員外郎史館修撰獨孤郁為人沉實敏行寡言聚
然文藻秀出於衆累升諫列再秉史筆洎掌功論率以
直聞求之周行不可多得而掖垣近職綸閣重選俯詢
時議爾宜居之

授沈傅師左拾遺史館修撰制

京兆府鄠縣尉沈傅師庶職之重者其史氏歟歷代以
來甚難其選非雄文博學輔之以通識者則無以稱命
今茲命爾其有旨哉昔談之書遷能修之彪之史固能

終之惟爾先父嘗撰建中實錄文質詳略頗得其中爾
宜繼前志率前修無忝爾父之官之職可左拾遺史館
修撰

除許孟容河南尹兼常侍制

昔吳公袁安為河南尹守皆能以廉平清肅馭吏教人
孰能繼之我有良吏某官許孟容才志甚大言論甚高
在臺閣間藹然公望嘗尹京邑觀其器用臨事能守當
官敢言不吐剛以如柔不附上以急下政無煩碎甚合

衆心及是轉遷頗有遺愛河洛千里都畿在焉凡所選
任必歸望實考言詢事非爾而誰不忘舊政可立新績
仍以騎省申而寵之

除李程郎中制

隋州刺史李程頃以詞學入叅訓命旋以才用出領詔
條漢東大郡委之共理勵精為政三年有成中外序遷
朝之彝典尚書郎缺爾宜補之

裴克諒權知華陰縣令制

華陰令卒非選補時調租勉農政不可缺前鎮國軍判
官試大理評事裴克諒久佐本府頗有勤績屬邑利病
爾必周知宜假銅墨試其才理待有所立方議正名

贈高郢官制

故尚書右僕射高郢立身從事皆有本末在亂不汙可
以言忠守官不撓可以言直以道佐主可以言正以年
致仕可以言禮有一於此人鮮克舉况備四者不亦君
子乎天不憖遺深用軫悼宜加褒贈以旌其風仍俾善

人聞而知勸可贈某官

貶于尹躬洋州刺史制

中書舍人于尹躬其弟臯謨賊汙狼藉雖無從坐之法
合當失教之責然以典職詔命恭勤五年我即念勞爾
宜思過俾居近郡茲謂得中

贈裴垍官制

故太子賓客裴垍忠正恭慎佐予為理事君盡禮徇國
忘身積憂與勞構成疾恙以至淪逝念之惻然頃屬多

故未申禮典永惟褒飾寧忘于心今則命數之閒宜從
加等庶使忠於君者有以勸焉可贈某官

除軍使邠寧節度使制

金方之氣凝為將星王者法天選命豪傑授之以鉞拜
為將軍以威西戎以護中夏而倚望若是安可非其人
哉某官某出忠入孝仗信抱義行有餘力學劍讀書鬱
然將材用兼文武自領軍衛為我爪牙夙夜警巡不懈
於位材官知訓環列增勲服勤五年茲為成績可以移

用使之守疆鄙

須倫切

邠大藩控扼胡虜若得良將則無

外虞知臣者君非爾不可仍加副相以重是行勉樹勤

勞式光寵擢

除韋貫之平章事制

周宣漢宣繼體之主一得申甫一得魏丙咸克致理號
為中興朕嗣位以來永監前烈惟是賢俊寤寐求思歷
選周行乃獲時彥宜以政柄舉而授之某官韋貫之溫
重明正國之公器當官必守臨事能斷簡在朕志迄今

累年乃者擢居諫司以觀其直出領符竹以觀其理煩
之劇務以觀其用訪之大政以觀其體歷試必中衆望
允屬倚之為相僉曰宜哉可中書侍郎同中書門下平
章事夫臣事君以忠后從諫則聖靡不有始鮮克有終
理化不成恒由於此今我與爾永終是圖雖休勿休以
臻其極嗚呼二宣之業吾有望焉

除拾遺監察等制

渭南縣尉庾敬休等咸文行清茂士之秀者官從吏列

擢在朝行各隨才用分命以職司諫執憲佇有可稱

除范傳正宣歙觀察使制

古之諸侯三載考績選其賢者命為長率所以勸功行
而興理化也蘇州刺史范傳正文學政事二美具焉選
自郎署出分符竹江南列郡連領者三所至之部悉心
為理明諭朝旨恭守詔條謹身省事以臨其下政簡而
速意誠而明吏不能欺人是以息而去思之歎來暮之
謠往復有政聞於人聽雖古循吏蔑以加之朕以陵陽

與壤土廣人庶其地有險所寄非輕跡其前効可當此
選况黜於宜切歟之遺愛尚在吳興之新政方播升車便
道足慰人心固當望風自安計日而理倚注於爾往宜
欽哉

邊鎮節度使起復制

執親之喪三年禮也聖人不得已而奪之金革之事無
避權也忠臣不得已而從之某官某握我兵要守在塞
門忠勇威惠合以為用師人悅附戎虜畏服迨彼諸部

聞其姓名況歲廣屯田日討軍實載陳遠略方集大勲
自罹家艱遽致公政茹荼銜恤已過旬時而軍旅不可
以無帥疆場不可以無主且慮人慢或生戎心蓋臣節
大於孝思王事急於情禮捨輕從重徇公滅私變而通
之正在於此俾加戎秩用護邊封往服舊職無違朕命
除任廸簡檢校右僕射制

書曰德懋懋官功懋懋賞此先王所以匡飾天下也其
有忠勞輸于國惠澤及於人高位厚賞朕無所愛某官

任迪簡頃以本鎮元戎來朝俾佐師律實掌留務屬偏
裨不軌誘動軍部亂行忤命至於再三而迪簡冒白刃
於戎首置赤心於人腹挺身誓衆罔不率逆群情既歸
因命為帥况閭閻蕩析思積切倉廩匱竭野有餓殍軍無
見糧又能推恩信以結衆心率勤儉以勸生業士旅悅
附流庸思歸周月之間泰然安堵開置幕府叶和親鄰
俾予無憂時乃之力夫為將守立功如斯不加爵賞何
勸來者建官惟百端揆長之自非勲賢不在此選以是

加等之命寵乃殊常之績俾增威於閫外仍就拜於軍中爾其欽哉無替厥命

除常侍制


某官某往以強毅剛正見稱於時擢在左曹俾之駁議旋以言動小有過差左遷遠藩亦聞有政雖經三黜僅歷二紀而堅直之氣終然不渝人之所難亦足嘉尚宜可束帶立之於朝正色謹言時有所取俾登西掖仍珥右貂從容前後以備顧問

除裴武太府卿制

聚九州之賦辯百貨之名按其度程謹其出納孰為主者外府上卿務殷秩崇不易其選某官裴武有通敏之識有倚辦之才以茲器用早膺任使小大之務罔不勵精累有勤績存乎官次而受藏之府國用所資若非使能何以集事俾陞顯列仍委劇務爾宜率其官屬欽乃職司會帑藏出入之要修權量平校之法以遵成式無使改易謹而守之斯為稱職



白氏長慶集卷五十四



總校官庶吉士 臣張能照

校對官庶吉士 臣曹錫齡

騰錄監生 臣張 霖

欽定四庫全書薈要

集部

白氏長慶集卷五十五

六

詳校官助教臣常循




欽定四庫全書薈要卷一萬三千九百八十五

集部

白氏長慶集卷五十五

唐白居易撰

翰林制誥二

凡四十三道

杜佑致仕制

敕盡悴事君明哲保身進退始終不失其道自非賢達孰能兼之司徒同平章事杜佑以長才名略為國元臣歷事四朝殆逾三紀出專征鎮為諸侯帥入贊台衮為

王室輔嘉猷茂績中外洽聞寵任既崇勤勞亦至頃以
年登致仕退請懸車方深倚注久未得謝勉就牽率迨
茲累年今抗疏披誠至於數四敦諭頗切陳乞彌堅期
於必遂理不可奪守冲知止佑實有焉賢哉大夫今古
同道宜從優異之命式表褒崇之禮尚資耆望俾傳東
朝可太子太師致仕如天氣晴和亦任朝謁昔祁奚申
叔皆就請老國有大事入議否臧忠臣愛君豈必在位
永觀前事期副茲懷

鄭涵等太常博士制

某官鄭涵等並早以文行久從吏職輩流之間頗為淹滯况雅有學識進修不已禮官方缺宜當此選凡朝廷禮制或損益有宜中外謚議或褒貶不決爾為博士皆得正之所任非輕各敬乃事並可太常博士

除韓臯東都留守制

國之都府半在東州未遑時巡方委留鎮非位望崇盛加之勤舊者則不足以允僉屬而副重寄也刑部尚書

韓臯名德之後鬱然公才正行通規貫於終始累遷臺府連鎮藩維入修職業出樹風聲故多遺愛著聞中外況一登朝序殆三十年舊德者望無居其右俾又東夏僉以為然乃加冢卿以示宗寵敬服嘉命永孚于休可檢校吏部尚書東都留守

中書舍人韋貫之授禮部侍郎制

典郊祀之禮獻賢能之書今小宗伯實兼二事非直清明正者不足以處之中書舍人韋貫之沈實賢峻文以

禮樂行成於內移用於官公直之聲滿於臺閣頃以詞藻選登禁掖秉筆書命時稱得人久積勤勞宜有遷轉可使典禮以和神人可使考文以第俊秀儀曹之選僉議所歸往修乃官無替厥問可禮部侍郎餘如故

薛存誠除御史中丞制

庶官之政得人則舉況中執憲準繩之司所以提振紀綱端肅內外蓋一職修者其斯任之謂歟給事中薛存誠選自郎署列於左曹居必靜專言皆謹正章疏駁議

多所忠益可以執憲立於朝端况副相方缺臺綱是領
糾正百官爾得專之夫直而不絞威而不猛不附上以
急下不犯弱以違強率是而行號為稱職敬服斯命往
其懋哉可御史中丞餘如故

前長安縣令許季同除刑部郎中前萬年縣令
杜羔除戶部郎中制

前長安縣令許季同前萬年縣令杜羔等頃自郎署分
宰京邑而長吏待之小乖常禮雖同辭託故動未得中

然遠恥以退道不失正各從免職亦既踰時况文行政
能皆推於衆詢諸時議宜有遷授尚書郎缺方選才良
憲部人曹俾膺並命李同可刑部郎中羔可戶部郎中
京兆少尹辛祕可汝州刺史制

京兆少尹辛祕頃守吳興時逢擾亂安人殄寇節効可
稱出倅戎車入貳高輦亦有政績著於官常今以汝郛
軍郡之大方求良吏委之分憂詢事考能爾當其選往
即乃土以舒吾人可汝州刺史

除李遜京兆尹制

近歲京兆長吏數遷誠不便時抑有其故或鈐

其廉切

鍵

巨展切

不謹吏緣為姦或鈎距大煩人受其弊既非中道

皆不得已而罷之宜求恬智寬猛相濟者親諭斯旨使
久於其職以息吾人浙江東道觀察使御史中丞李遜
十年以來連守四郡或紛擾之際或荒饉之餘威惠所
加罔不和輯賞其殊績擢在大藩自臨會稽一如舊政
况省科禁以便俗通津梁以息征動遵詔條深副朝旨

江南列鎮良帥則多集課程功爾為稱首而內史之選
久難其人今予所求唯爾可使雖表率州部其委非輕
然尹正京師所資尤急宜覈材於浩壤佇觀政於輦轂
望爾有成無替厥命可權知京兆尹

除孔戣

渠為切

等官制

渾金璞玉方圭圓珠雖性異質殊皆國寶也是故能官
人者亦辯而用之諫議大夫孔戣靜專貞白不涉聲利
執言守事無所依違駕部郎中薛存誠廉潔直方飾以

詞藻中立不倚介然風規吏部員外郎王涯端明精實
加之以敏懿文茂學尤推於時並歷踐朝行恪勤官次
諫垣郎署藹其休聲宜加公獎擢在近侍左右禁闥可
以同升必能評奏臺議發揚綸誥臨事有立屬詞可觀
各隨所長分命以職祇奉乃事無替厥猷存誠並可
給事中涯可兵部員外郎知制誥

除李建吏部員外郎制

六官之屬選部郎首之歷代以來諸曹郎之中擇其踐

歷久考第高加以有器局律度者遷焉今之選任亦由是矣兵部員外郎李建文行才理公勤課績可謂具美宜居厥官歲調方殷勉勤爾事可吏部員外郎

除劉伯芻虢州刺史制

給事中劉伯芻以文雅才名給事左闔實掌駁議再逾歲時亦謂恪勤宜從遷轉而虢畧近郡黎人未康藉爾良能為予撫字懸賞佇効勉哉是行可授虢州刺史

除周懷義豐州刺史天德軍使制

西受降城尤居邊要西戎北虜介乎其間委之郡符建
以戎號將守之選宜乎得人前汝州刺史周懷義久列
禁衛嘗從征伐又領軍郡率著勤功宜加獎用可屬憂
寄況茲要鎮實扼戎吭犄角諸軍局鑄右地牧人訓旅
兼領非輕無替前勞在申後効可豐州刺史天德軍使
除某官王某魏博節度使制

師長之選重難其人況河上列城鄴中雄鎮初喪良帥
思安衆心若親與仁方膺是命某官王某出忠入孝根

乎至性好學樂善出於餘力發自修已施于為政可以
守土可以長人今兩河之間三軍乏帥是用命爾領茲
大藩澄清魏風輯理相土為我垣翰永孚于休往其欽
哉無替厥職可魏博等州節度觀察使

除某節度留後起復制

懋勲德者慶鍾於嗣襲忠順者教本於親於是乎有代
及之恩有賞延之命所以光子道而激臣節也茲惟舊
典可舉而行某官某惟乃祖父勤勞王家咸有忠功書

於甲令降及於爾亦克負荷早承義訓久倅戎塵自罹
憫凶能著成敬恭俟朝命靖安人心雖在幼冲足可嘉
獎今屬元戎初喪衆望顚然宜選親賢以為統帥留府
之事俾爾專之加戎秩以奪哀遷冬卿以示寵奉揚新
命無忘前修爾宜懋哉懸賞佇効可節度留後檢校工
部尚書

除薛平鄭滑節度制

武牢以東至於白馬形勢之地水陸之會宜擇文武兼

備者以為守臣右衛將軍薛平自司禁旅為我爪牙訓
整警巡能宣其力嘗使於絕國可謂有勞嘗牧於大郡
亦聞有政況忠厚為質通明為用秉吏道之刀尺襲將
門之弓裘可以為三軍之帥可以理千乘之賦俾輟才
於北落往節制於東方爾宜式遏四封輯寧百衆明簡
稽以實軍旅信賞罰以勸吏人勉率乃職無忝厥命仍
以冬卿副相兼而寵之可檢校工部尚書兼御史大夫
除盧士玟劉從周等官制

君有舉左史得書之政有闕諫官得補之二職者歷朝之清選也前侍御盧士玟嘗在西川時為從事亂危潛伏能潔其身前監察御史劉從周頃佐宣城奉公守政端士之操終然不渝時所稱論並宜甄獎况學術詞藻見推於衆並命清貫僉以為宜記事盡規各行能效士玟可起居郎從周可右補闕

張正一致仕制

前諫議大夫張正一學行器用為時所稱擢居諫官冀

効忠讜雖年齒未暮而衰疾有加所宜頤養不可牽率
俾移優秩以從致政可國子司業致仕

張正甫蘇州刺史制

浙右列城吳郡為大地廣人庶舊稱難理多選他郡二
千石之良者轉而遷焉鄧州刺史張正甫自領南陽僅
經三載廉平清簡以臨其人人安政和理行第一宜以
大郡推而廣之用旌前勞且佇來効可蘇州刺史

崔清晉州刺史制

左司郎中崔清以才良行敏補尚書郎頗積公勤宜加
獎任頃嘗為郡亦聞有政平陽舊壤時謂名藩得才與
能方可共理安人訓俗佇有成績可晉州刺史

除柳公綽御史中丞制

中憲之設糾謬懲違一引其綱百職具舉非清與直不
稱厥官諫議大夫柳公綽忠實有常文以詞學介然端
直有古之遺風頃居臺憲累次郎位持平守正人頗稱
之擢首諫司器望益重今副相缺位中司專席惟有守

者可以執憲惟無私者可以閑邪詢事審官爾當是選
光昭新命振起舊章宜一乃心以揚其職可御史中丞
除田興工部尚書魏博節度使制

馭下安人其道不一或序能以次用或因效以拔才所
命雖殊同歸共理某職某官田興時屬本軍初喪戎帥
亂政咸啓羣心不寧而興列在偏裨奮其義勇謀成必
中事至能斷智畧所及指麾所加一軍獲安百衆附悅
連獻章疏恭俟制命有節有禮朕用嘉之夫以將材如

彼軍情若此允膺不次之舉可貴非常之功是用寵之
冬卿擢為大將仍以印綬就拜軍中其敬之哉無墮乃
力可檢校工部尚書兼御史大夫魏博等州節度觀察
等使

除鄭餘慶太子少傅制

東朝三少歷代重選不必備位在乎得人吏部尚書鄭
餘慶貞明儉素有古人風發自修身施于為政出入中
外多歷要重咸有勤績存於官次況動中禮法學綜儒

玄是謂羽儀之臣可居師傅之任輔我元子爾其勉歟
可太子少傅

除裴堪江西觀察使制

江西七郡列邑數十土沃人庶今之興區財賦孔殷國
用所繫茲為重寄宜付長才同州刺史裴堪素蓄器幹
久經任遇日者資其忠諒入為諫議大夫藉其良能出
為左馮翊曾未周歲政立績成區區一郡未盡其用鍾
陵要鎮可以委之夫簡其條章平其賦役徇公率正以

臨其人而人不安未之有也祇服厥命往修乃官仍兼
中憲以示優寵可江西觀察使兼御史中丞

贈杜佑太尉制

生有爵祿歿有褒贈此王者所以崇哀榮之禮厚君臣
之恩況有輔臣所宜加等某官致仕佑以通濟之才公
忠之節逢時入用為國大臣外領藩鎮內叅台鉉積勤
盡悴迨過三紀左右于位亦既八年天不慙遺奪我元
老憫然興歎實軫于懷永言褒榮俾峻禮命上公之秩

用賁幽靈嗚呼錄舊旌勞知予不忘可贈太尉

除孔戢萬年縣令制

京邑令缺多擇尚書郎有才理者補之兵部員外郎孔戢自御史府遷夏官之屬凡所蒞職一心奉公在郎署間稱有名實加以文學緣飾吏能俾宰京劇佇有成效除裴向同州刺史制

馮翊之地密邇郊畿分內史之政叅京師之化俾善所職其在得人京兆少尹裴向器蘊利用學通政事久試

吏治頗著良能累守大郡入亞天府奉上撫下皆有可
稱左輔之重爾膺其選況征賦猶重人庶未康實望良
才與之共治勉副所舉往修厥官可同州刺史

除武元衡門下侍郎平章事制

朕嗣守丕業迨將十年實賴一二輔臣與之共治故外
鎮方域則仗以為將有絳侯厚重之質有邴吉寬大之
風自登台司克厭人望頃屬巴蜀軍後人殘權委節旋
俾往鎮撫信及夷貊恩加疲瘵每因利以施惠不易俗

而修教政無苟得人用便安惠茲一方時乃之績報政
既久屬望益深宜歸左輔以叅大政夫坦然公道可以
叙衆才曠然虛懷可以應群務弼違救失不以尤侮為
慮進善懲惡不以親讐言自嫌用是輔君足為名相欽率
是道往復乃官可門下侍郎同中書門下平章事

除李夷簡西川節度使制

征鎮之大實惟蜀川西距於戎南漸於海有重江複山
之險有長轂堅甲之旅水陸交會華夷雜居疇能治之

我有良帥山南東道節度使某官李夷簡以正事上以
簡臨下仗茲器用累當任遇執憲之難也爾為臺丞其
職甚舉司計之重也爾調邦賦其効可稱爰資長才出
領重鎮自總符鉞于漢之南專奉詔條削去敝政均穀
籍不一之賦罷舟車無名之征近悅遠來歸如流水俗
用丕變人迄小康三載考功爾為稱首進其右秩遷于
大藩以均惠乎四方以旌勸乎羣吏昔文翁明於教化
种持中切曷優於政能巴蜀之間遺愛猶在不替前効可

以副之佇聞有成用光厥命可檢校吏部尚書劍南西川節度等使

除袁滋襄陽節度使制

漢以二千石之良者入為公卿周以六官之賢者出兼侯伯內外之任所命則殊至於治軍國寵忠賢其致一也戶部尚書袁滋奉上甚勤臨下甚簡安人附衆尤是所長須資其能移鎮東郡略其科禁緩其征徭政不滋彰人用休息在部七載績成課高璽書徵還益聞遺愛

老幼遮道事鄰古人朕方勤卹疲民褒獎循吏累月再命其有旨哉舉鄭滑之政也故旌武公之美寵以司徒憂襄漢之人也故仗叔子之才委茲征鎮類能而使其在此乎勉揚厥聲無替前効可某官山南東道節度等使

歸登右常侍制

近侍之列騎省為貴歷代迄今選任頗重必詢望實而後命之工部侍郎歸登朴忠沉厚心無詭詐介圭不飾

止水無波澹然自居以致名稱抱此素行歷踐清貫掌
議左掖貳職冬官歲時滋深體望益茂可以備顧問應
對之選列言語侍從之臣冠附貂蟬立之於右訪諸時
論僉以為然可右散騎常侍

李程行軍司馬制

隋州刺史李程頃自周行出分憂寄漢南大郡守之五
年頗著良能宜當選獎况專習文學通知兵事西南重
鎮初委元戎慎選副車爾當此舉三軍之重俾往貳之

仍加憲職以示優寵可御史中丞劍南西川行軍司馬
李甌虞部郎中制

金州刺史李甌雅有文藝飾以政事早從吏職久領郡
符謹慎廉平頗副所任虞曹郎缺命以序遷敬茲寵名
勉守厥位可尚書虞部郎中

牛僧孺監察御史制

河南縣尉牛僧孺志行修飾詞學優長頃對策於庭其
言甚直累從吏職頗謂滯淹訪諸時論宜當朝選俾升

憲府以觀其才可監察御史

裴克諒量留制

華州刺史奏華陰令裴克諒在京清白奉法考秩向滿其政如初借留三年用觀成績朕方旌求良吏俾養黎庶適副所懷宜可其奏

張聿都水使者制

前湖州長史張聿頃以藝文擢升朝列嘗求祿養出署外官名不為身志亦可尚喪期既畢班序當遷俾領水

衡以從優秩可都水使者

薛伾

鋪杯切

廊

芳無切

坊觀察使制

廊時延安抵于中部羌夷種落散在其間戎夏雜居易
擾難理宜選寬明之使通知邊事者委以符節而糾綏
之右金吾將軍薛伾服勤戎職練達吏道出入中外綿
歷歲年能一乃心以宣其力自加寵遇再執金吾徵巡
有嚴夙夜匪懈在公若是何用不臧況為人沉静內肅
外和按俗守封是其所善宜輟務於誰何俾宣風於廉

察庶乎勞俸諸部綱紀列城奉詔條以安人叅戎索以
訓旅欽承厥命往復乃官仍踐冬卿式光重寄可檢校
工部尚書充廊坊等州觀察使

韓愈比部郎中史館修撰制

太學博士韓愈學術精博文力雄健立詞措意有班馬
之風求之一時甚不易得加以性方道直介然有守不
交勢利自致名望可使執簡列為史官記事書法必無
所苟仍遷郎位用示褒升可依前件

李暈安州刺史制

宿州刺史李暈勲閥之門嗣生才略久叅戎衛頗著勤勞試守列城觀其為政屬汴泗之右創畫州居府署城池委之經始一日必葺三年有成且聞公勤宜有遷轉重分憂寄再佇良能往安吾人無忝厥命可安州刺史

竇易直給事中制

前御史中丞竇易直器質識智厚重閒敏文合法要學通政經累踐臺郎擢司邦憲寬猛舉措甚得其中官不

易方府無留事前因病免今以才遷俾升瑣闥以備顧問夫制令奏議官獄典章苟有依違皆得駁正所任不細宜敬乃官可給事中

孟簡賜紫金魚袋制

漢制二千石有政績者就加寵命不即改移蓋欲使吏久於官人安其化也常州刺史孟簡簡易勤儉以養其人政不至嚴心未嘗怠曾未再稔績立風行歲課郡政毗陵為最方求共理實獲我心宜加命服以示旌寵庶

俾羣吏聞而勸焉宜賜紫金魚袋

盧元輔杭州刺史制

河南縣令盧元輔早以學藝列在周行嘗守商都頗聞
有政再領京縣益見其才江南列郡餘杭為大征賦猶
重疲人未康藉爾登車往分憂矚勞徠安緝稱朕意焉
懸賞旌能以佇報政可杭州刺史

白氏長慶集卷五十五

欽定四庫全書薈要卷一萬三千九百八十六

集部

白氏長慶集卷五十六

唐 白居易 撰

翰林制詔三

敕書批荅祭文贊文附凡五十五首

與王承宗詔

敕王承宗朕臨馭天下及此五年三叛誅夷四方清泰
不以功武自負常推恩信為先爾父云亡即欲命卿受
詔而遠近方鎮内外人情紛然奏陳皆云不可朕以卿

累代積勲賢之業一門有忠義之風功著艱危恩連姻戚雖中心是念而衆請難違可否之間久不能決然亦欲觀卿進退之禮察卿忠孝之心卿自罹憫凶屬經時月待使臣而動皆得禮奉章疏而言必由衷請獻官負願輸貢賦而又上陳密款遠達深誠潔身而謀出三軍損已而讓推二郡斯有以得臣子之大節知君親之大恩卿心既然朕意亦定特加新命仍撫舊封今授卿起復左金吾衛大將軍檢校工部尚書充成德軍節度使

恒州刺史恒冀深趙等州觀察等使兼御史大夫仍賜
上柱國并賜告身旌節等往想卿忠孝哀感兼深其德
棣兩州以卿進讓尤欲於卿親屬之內選授一人在法
雖有推恩相時亦恐非便今所以除薛昌朝德棣兩州
觀察使昌朝昔嘗事卿先父今又與卿親鄰卿宜具以
誠懷令報昌朝知委卿今授命之後足得節制三軍使
其不失事宜方見卿之忠蓋昨者衆情易惑非卿不能
効此誠群議難排非朕不能斷此意所宜保持大義勉

勵遠圖深念斯言永副予望其當軍大將已下各宜特
與改轉卿即條錄聞奏其官健等亦宜量加優賞想宜
知悉

答李遜等謝恩令附入屬籍表

卿先父頃逢多難嘗立大功每想忠勞豈忘存歿念先
臣之績雖書名於太常推同姓之恩更附籍於宗正俾
增榮於一族兼延寵於九原卿等或詩禮承家或弓裘
奉業咸鍾新命慶屬本校省所謝陳深嘉誠懇

祭盧虔文

維元和四年歲次己丑七月日皇帝遣某官某以清酌
庶羞之奠致祭於故祕書監贈兵部尚書盧虔之靈惟
爾質性端和風猷茂遠名因文著位以才升秉大節而
事君始終一致陳義方而訓子忠孝兩全甲族推華士
林增美久在貂蟬之列近遷圖籍之司方延寵光遽閔
幽窆詳亦切褒獎之命雖已表於哀榮遣奠之恩宜再申
於軫悼魂兮不昧鑒此誠懷尚饗

批李夷簡賀御撰君臣事跡屏風表

朕思求理化親閱典墳至於去邪納諫之規勤政慎兵之誠取而作鑒書以為屏與其散在圖書心存而景慕不若列之繪素目覩而躬行庶將為後事之師不獨觀古人之象卿詞彰恭順義見忠規省覽再三深叶朕意所賀知

批百寮嚴綬等賀御撰屏風表

朕烈祖太宗以古為鏡用輔明聖實臻理平垂作孫謀

每懼乎失墜取為殷鑒遂飾丹青至若明君直臣前言
往事森然在目如見其人論列是非既庶幾為座隅之
誠發揮獻納亦足以開臣下之心況卿等職在儀刑政
當補察各勤所任共副茲懷所賀知

答杜兼謝授河南尹表

卿文通吏道學達政源凡歷官常輒聞績効觀能以授
俾亞理於三川見可而遷宜專臨其一府盡委封畿之
政仍兼運漕之權歲時之間佇有勤効勉恭爾職重副

予懷所謝知

與茂昭詔

敕茂昭盧校等至省所奏恒州事宜并別論情陳獻者
具悉卿望重勲賢寄崇藩鎮謀叅廟算寵接國姻累上
表章繼陳誠款永言智畧已見匡濟之才載念公忠益
表感知之志若非勞瘁憂國義勇忘家則丹赤之心不
能至此想風興歎至於再三所緣恒州事宜朕亦思之
甚熟但以武俊率身仗順於國有功忠勲所延宜及俊

嗣承宗又密陳深款遠獻忠誠既念舊勞已降成命計其奉詔必合感恩如或乖違續有商議卿宜以睦鄰為事體國為心想卿誠懷當悉朕意

與師道詔

敕師道省耒具悉卿業重相門位崇戎閫忠輸於國行著於家久而益彰嘉歎無已所奏亡兄師古請列於私廟昭穆者此乃心推孝友誠切恭敬覽表見情深足嘉尚但以祠廟所見貴於禮成師古雖則始營至卿方行

祔禮即卿為廟主固合其宜況師古爵位尊崇弘選自合祔廟別立祠宇使其主之奉以蒸嘗亦非乏祀也已令有司重議如此頗謂得中且叶禮經卿宜知悉

與於陵詔

敕於陵省所賀安南破環王國賊帥李樂山等三萬人者具悉卿蠻夷犯疆方鎮致討兇徒喪敗荒徼清平卿素蘊忠誠又連封壤疾既同於山藪勢益壯於輔車想聞捷書當倍慰愜載省所賀深見乃懷

答段祐等賀冊皇太子禮畢表

朕祇膺統序恭守典常爰推至公乃命長子使主國綏
用貞邦家冊畢禮成良增感慶卿等各司軍衛同奉表
章備見忠誠益深嘉歎所賀知

答李詞賀處分王士則等德音表

朕臨馭天下以懲勸為先有惡必誅無功不念顧承宗
之罪誠合討除思武俊之勲宜令嗣襲况墳墓禁其剪
伐將校許以歸降庶明用師益非獲已卿職修卿寺誠

奉本枝省茲賀章備見忠藎

與吐蕃宰相鉢闡布敕書

敕吐蕃宰相沙門鉢闡布論與勃藏至省表及進奉具
悉卿器識通明藻行精潔以為真實合性忠信立誠故
能輔贊大蕃叶和上國弘清淨之教思安邊陲廣慈悲
之心令息兵甲既表卿之遠略亦得國之良圖况朕與
彼蕃代為甥舅兩推誠信共保始終覽卿奏章遠叶朕
意披閱嘉歎至於再三所議割還安樂秦原等三州事

宜已具前書非不周細及省來表似未指明將期事無

後艱必在言有先定今信使往來無壅疆場

音亦

彼此不

侵雖未申以會盟亦足稱為和好必欲復修信誓即須
重畫封疆雖兩國盟約之言積年未定但三州交割之
後尅日可期朕之衷情卿之志願俱在於此豈不勉歟
又緣自議三州已來此亦未發專使今者贊普來意欲
以再審此言故遣信臣往諭誠意即不假別使更到東
軍此使已後應緣盟約之事如其間節目未盡更要商

量卿但與鳳翔節度使計會此已處分令其奏聞則道路非遙往來甚易頗為便近亦冀速成更待要約之言皆已指定封疆之事保無改移即蕃漢俱遣重臣然後各將成命事關久遠理貴分明想卿通才當稱朕意曩者鄭叔矩路泌因平涼盟會沒落蕃中比知叔矩已亡路泌見在念茲存歿每用惻然今既約以通和路泌合令歸國叔矩體骨亦合送還表明信誠兼亦在此其論興勃藏等尋到鳳翔舊例未進表函節度不敢聞奏自

取停滯非此稽留昨者方進表函旋令召對今便發遣
更不遲迴仍令與祠部郎中兼御史中丞徐復及中使
劉文璨等同往其餘事宜已具與贊普書內卿宜審於
謀議速副誠懷兼有少信物賜卿具如別錄至宜領也
冬寒卿比平安好遣書指不多及

與希朝詔

敕希朝省所奏請自部領當道兵馬一萬五千人取蔚
州路赴行營并奏土門及承天軍各添兵士備禦者具

悉卿武毅雄才忠貞大節出為良將倚作信臣約已徇
公忘身許國忿違命不恭之寇激勤王自効之心親統
銳師率先群帥況又周知要害備設防虞計其威聲已
振克醜有臣如此朕復何憂佇建殊功以副深重所有
動靜宜數奏聞想當知悉

與師道詔

敕師道朱何至省所奏當道赴行營兵馬取正月過渡
河逐便攻討并奏兵馬出界後請自供一月糧料又奏

待收下城邑若有軍糧一月已後續更支計并陳謝慰
問者具悉卿文武間生忠貞特立動有所効知無不為
昨獻帛助軍極盈數於萬足今又賫糧出境減經費於
三旬此乃力之所任無不罄竭慮之所及無不經營因
時見憂國之心臨事識忠臣之節詔書慰諭未盡朕懷
章疏謝陳益嘉乃至再三興歎寤寐難忘其所奏聞並
依來表想宜知悉

與劉濟詔

敕劉濟李臯至省表及露布十二月十七日劉緄部領
當道行營兵馬收下饒陽縣城破賊衆三千人并擒斬
將校收獲馬畜器械等無送賊將朝履清等四人又進
所收饒陽縣等者具悉卿盡忠伐叛發漁陽精統之師
緄仗順臨戎討冀方昏狂之寇詔下而父子戮力鼓行
而將卒齊心先群帥以啓行首諸軍而告捷連擒逆將
併下賊城歸獻罪之俘囚進已收之縣邑可謂忘身徇
國盡禮事君疾風知偃草之心大雪見貞松之節况表

章之內益歎恭勤而眷想之間如覩風采計茲允醜當
已震驚破竹之勢可乘覆巢之期非遠佇清大懃重副
深懷其饒陽縣卿宜且令鎮守稍加存撫用勸將來宋
常春卿所密奏具委事情且宜叶和以體朕意故令宣
慰想當知悉

祭吳少誠文

維元和五年歲次庚寅二月辛未朔二日壬申皇帝遣
內侍省內府局丞賜緋魚袋孫士政以清酌庶羞之奠

致祭於故彰義軍節度使贈司徒吳少誠之靈曰惟爾
武毅挺質韜鈴拔身負勇果之雄才蓄變通之明識自
察廉列郡節制成師貞且有為勤而不擾軍戎輯睦封
域底寧從義而致誠仗順而保福既延寵渥方茂輝榮
遽此幽淪深用傷悼逝波不捨去日苦多想松楸以軫
懷聞鼓輦而興歎恩加遣奠禮舉褒崇念爾有靈知予
此意尚饗

與季安詔

敕李安省所奏當道行營兵馬今月十七日已收棗強
縣其賊棄城夜走者具悉卿輸忠報國嫉惡忘家遣無
敵之師伐不韞之寇軍聲遠屆先路以風行逆黨潛知
棄城而宵遁已收縣邑益振兵威此皆卿訓練所加指
麾有素永言明効實屬深懷固可乘勢應機逐便進討
以卿忠藎當副朕心

與希朝詔

敕希朝張嘉和至省初奏前月二十六日破逆賊河湟

鎮六千餘人具悉卿親領統師誓誅逆黨張軍心以吞敵奮士力而指蹤潛戒偏裨先攻險阻伐謀而事有成算尅日而動不愆期果敗兇徒遂據要地况殺傷既重收獲頗多益壯軍威可奪虜氣佇聞埽蕩以慰衷懷

與從史詔

敕從史曹公又至省所奏今月三日柏鄉縣南破賊衆約三萬人并擒斬首級收獲器械及馬等又奏當軍所傷士馬數并量事優卹事宜具悉卿外揚武略內竭忠

謀率有名之師深入其阻遇無狀之寇大挫其鋒兵刃
屢加捷書頻至殺傷數廣績効居多非卿悉力摧兇誓
心報國則何能指麾之下動必成功表奏之間事皆審
實既光重委益副深懷嘉歎再三不忘寤寐所奏承璫
出軍合陣并續發露布事宜具委所陳想當知悉

與季安詔

敕季安許峯至省所奏具悉卿勲親重德台輔元臣竭
誠信以戴君弘識度而體國謀能極慮言必盡忠周覽

表章益增寤歎吳少陽自叅軍務頗効恭勤豈待奏陳
已有處分想宜知悉

與昭義軍將士詔

敕昭義軍節度下將士等卿等當軍將士與諸道不同
自經艱難多易將帥而忠順之節未嘗有虧朕每思之
無時暫忘盧從史為卿主將作朕藩臣權位尊崇恩寵
優厚而乃外示恭順內懷姦邪刻削軍中暴殄境內朕
以君臣之道未忍發明為之含容頗有年月近又苟求

起復請討恒州與賊通謀為國生患自領士馬久屯行
營收當軍賞設之資加本道芻粟之估不為公用盡入
私家此則主將之罪於卿何有臣子之分負朕日深卿
等辨邪正之兩端識逆順之大義抱忠勇者恥居其下
守名節者憤發於中失三軍之心已聞大去犯衆人之
怒果見不容遠察事宜備知誠款興言嘉歎至於再三
其當軍將士等賞設已有處分上自將校下及士卒各
勵爾志再思朕言卿等承前以來常保忠貞之節自今

以後永為心腹之軍宜念始終副茲矚望故令宣慰宜
並悉之夏熟卿等各得平安

與承瓘詔

敕承瓘

取猥切

卿總領禁軍控臨戎境見敵每彰其勇敢

因事益表其忠勤言念在懷發於寤歎昭義軍將士等
去邪遠惡仗義保忠統其成師宜得良帥孟元陽夙懷
武毅累著功庸威名甚彰人望所屬以之為帥必愜軍
情以之討賊必有勲績今授元陽檢校尚書右僕射充

昭義軍節度等使未到行營間其昭義軍卿宜切加宣
撫務使安寧烏重胤職在偏裨保於忠正宜從獎擢以
表殊恩今授烏重胤河陽節度使兼御史大夫卿亦宜
諭此恩意令知朕心兼恐河陽無人速宜進發想當知
悉

與元陽詔

敕元陽澤潞全軍方討恒冀盧從史虧失大節包藏二
心姦迹邪謀日已自露軍情物議俱所不容尋追赴朝

今已在道朕以昭義將士忠順成風況在行營久勤戎
事今欲使其戰者奮發居者悅安共成大功必在良帥
以卿有澱水之勲効有河陽之政令思之甚熟無以易
卿宜領重藩仍遷宗秩今授卿檢校尚書右僕射充澤
潞節度等使并賜旌節告身等往卿宜速發先到潞府
上訖便赴行營慰安軍心宣諭朕意烏重胤徇忠守節
宜加獎用今便授重胤河陽節度使兼御史大夫想宜
知悉

與昭義軍將士詔

敕昭義軍節度下將士等卿等久在行營乍無主將而士旅輯睦軍壘安寧足彰守正之心尤見盡忠之節以此歎矚勞於寢興孟元陽是朕信臣為國良將威畧可以攝兇孽慈和可以牧師人累著忠勤克諧朕命為其主帥必副群情況卿等同嫉姦邪久困貪暴宜以仁賢之帥撫卿忠義之軍靖思元陽無出其右今授元陽檢校尚書右僕射充卿等當道節度使勉同王事以慰

朕懷烏重胤特効忠誠深宜獎擢今便授河陽節度使
兼御史大夫故令宣慰並宜知悉

與師道詔

敕師道林英至省所陳奏并進王承宗與卿書者具悉
王承宗童騃無知兇器有素雖籍祖父之寵曾微分寸
之勞但以武俊勲在冊書姻連戚屬朕獨排羣議特降
殊私未卒父喪使承祖業即加新命仍撫舊封則朕於
承宗恩亦至矣而偽陳誠款欺誑使臣假託軍情拒違

詔命則承宗於朕罪莫大焉悖禮亂心暴於天下此乃

承宗干國家之紀非朕忘武俊之功遂至用師蓋非獲
已仍開生路許以自新而梟音不悛鵠張益熾人情共
棄國典不容在於朕心安敢輕捨卿既膺注意義感酬
恩所獻表章具已詳覽慮深遠計詞切謹言在忠謀而
則然於事體而未可誠嘉勤至難允懇懷今諸道將帥
親領士馬深入寇境頻奏捷書四面合圍一心旅進窮
迫已甚覆滅非遙况卿同遣師徒已收縣邑冀清氛孽

佇見功名勉於令圖副此矚望

與師道詔

敕師道任文質至省表具悉盧從史頃者請率全師誓
清妖孽推誠待物許之不疑而背恩於上結怨於下邪
謀貳志日以彰聞虧大節而自絕於君積群怒而不容
於衆因以邀命幸而脫身屈法申恩已有處分昨者詔
旨已明示卿卿體國為心事君盡力固宜有聞必薦有
見必陳竭其忠諒之誠濟其獻替之美省閱章奏嘉歎

良多

與茂昭書

敕茂昭王日興至省所奏今月十八日大破賊衆一萬
七千人并擒斬收獲訖者具悉卿親率勁兵誓平妖寇
竭股肱之力中有奇謀勵父子之軍前無強敵故能深
入賊境大破兇徒殺傷既多俘獲亦廣具詳奏報備見
忠勞眷屬之懷發於寤歎將士等各懷勇烈同忿寇讐
激於衆心致此殊効况荷戈於炎暑之際奮身於鋒刃

之間永念於茲未嘗暫忘故令宣慰宜並悉之

與昭義節度親事將士等書

敕昭義軍節度下親事將士等盧從史受恩至重負國至多衆所不容追令赴闕朕以誤曾任使貴全始終今則止於貶官此蓋曲從寬典卿等抱忠懷義朕所素知頃以詣營同事從史三軍一體俱是王臣既不相干又能自効朕方優賞以酬功勲何至不安有此疑懼必恐從史已追之後元陽未到之間卿等當營乍無主將或

被外人扇誘令衆意憂疑勢使之然事非獲已朕雖在
此遠有軍情料卿本心必無此意况元陽勤儉恤下寬
厚愛人久在河陽甚近澤潞元陽臧否卿等合諳以卿
忠義之軍故擇仁賢為帥已有詔示宣諭元陽若到行
營一無所問乃至將士家口亦令優卹安存卿復何憂
必得其所况昭義將士艱難以來保守忠貞未嘗虧失
天下稱歎卿亦自知又卿父母妻兒家田墳墓一物以
上並在潞州頃刻之間豈忍便棄朕之此語卿宜細思

各相勉諭同保忠順計元陽已合到彼卿等便取元陽
指麾想卿等心必副朕意故令宣慰並宜知悉

與執恭詔

敕執恭王克謹至省所奏今月八日進收平昌縣已令
鎮守并奏劉濟欲與卿約義事者具悉卿奉辭伐罪仗
節啓行指顧偏裨收復城邑已令鎮備兼務緝綏威惠
之方既明弔伐之義斯在永言倚任彌注衷情劉濟將
相大臣與卿先父同列欲求契為固合允從豈惟繼好

私情亦足叶心王事載省來奏深鑒乃誠至於寢興不
忘嘉矚

與恒州節度下將士書

敕成德軍節度下將士等朕以王者之道與物無私若
違命執迷則罔有容捨若知非改悔則無不含弘不窮
無告之人不塞自新之路頃屬姦臣從史謀構異端致
使恒陽隔於恩外六郡之地皆廢農桑三軍之人並懼
鋒鏑每一念至中心憫然今卿等繼獻表章遠輸誠款

省承宗之勤懇難阻其情思武俊之功勞不能無念況
事因註誤而理可哀矜今已降制書各從洗雪承宗仍
復舊官爵充恒冀深趙德棣六州觀察使成德軍節度
使將士等官爵實封並宜仍舊待之如初卿等各宜協
力同心知恩感德共保終始稱朕意焉故令宣慰宜並
知悉

與承宗詔

敕承宗頃者盧從史包藏姦詐矯示公忠下誣物情上

惑朝聽使卿陷於違命使朕至於用兵交亂君臣罪有
所在今從史已正刑典遠棄驩州已構亂者既就屏除
誘陷者自宜明白况卿代連姻戚朕豈不思祖有功勞
朕豈不念事不得已勢至如斯棄絕以來常懷憫惻卿
今既陳章疏懇獻衷誠請進官負願修貢賦誓心以納
款歸罪而責躬情可哀憐法存開釋朕託於人上及茲
六載體天地含弘之德厚君臣終始之恩常以人安為
心豈欲物失其所今所以開獨見之路降非常之恩卿

及將士等已具制書並從洗滌卿仍復舊官爵便充恒
冀深趙德棣等州節度觀察等使并賜旌節告身等往
爵土仍舊君臣如初想卿中懷當自知感所宜追補前
悔勉勤後圖夙夜思之永副朕意想當知悉

批宰相賀赦王承宗表

先臣武俊功不可忘後嗣承宗過而能改朕所以捨其
罪悔議以勲親垂宥過之恩尚宜及爾十代引泣辜之
責誠合在予一人與其黷武而取威不若匿瑕而務德

卿等重居台輔密贊謀猷發於衷誠有此稱賀省閱章奏嘉歎久之

與劉濟詔

敕劉濟省所謝男紹及孫景震等授官并謝賜器仗弓甲刀斧等者具悉卿文武全才將相重任本於忠諒成此勲勞尚德尊賢位已極於台輔念功懋賞寵宜及於子孫時論允歸朝章斯舉至於出茲戎器賜我元臣但可以申朕恩私未足以表卿功績載覽來表備見乃誠

併此謝陳益嘉勤蓋

代王佖答吐蕃北道節度論贊勃藏書

奉敕撰

大唐朔方靈鹽豐等州節度使檢校戶部尚書寧塞郡

王王佖

薄密切

致書大蕃河西北道節度使論公麾下遠

辱來書兼蒙厚貺慰悚之至難述所懷國家與彼蕃代
為舅甥日洽恩信雖云兩國實若一家遂令疆場之臣
得以書信相問况麾下以公忠之節雄勇之才翊佐大
邦經畧北道似近蒙制命守在邊陲慰望之情一二難

盡皇帝以贊普頻遣和使懇求通好凡此邊鎮皆奉朝

章但令慎守封陲不許輒令侵軼至於事理彼此宜然

且如寔

都項切

項久居漢界曾無征税既感恩德未嘗動

搖然雖懷此撫循亦聞闕

缺規切

彼財貨亡命而去獲利

而歸但恐彼蕃不知大為党項所賣其中亦聞誘致事

甚分明不能縷

盧舉切

陳計已深悉今請去而勿誘來而

勿容不失兩境之歡不傷二國之好在此誠為小事於

彼即是遠謀幸履坦途勿遵邪徑今聖上德柔四海威

及萬方雖外國蠻夷尚皆率伏況中華臣妾敢有不恭
豈假彼蕃欲相借助誠愧厚意終訝過言承去年出師
討逐迴紇其間勝負此亦備知不勞來書遠相示及所
蒙寄贈並已檢到似為邊須守常規馬及胡瓶依命已
受其迴紇生口緣比無此例未奉進止不敢便留今却
分付來人至彼望垂檢領有少答信具如彼數幸恕寡
薄也初秋尚熱惟所履珍和謹因譯語官馬屈林恭迴
不具似白

與吉甫詔

敕吉甫韓用政至省所奏陳謝具悉卿忠貞立身文武
為德志惟經國謀不忘君才可以雄鎮方隅故委之外
閫智可以密叅帷幄故任以中樞而能一其衷心再有
冲讓雖勞謙彌切每陳丹府之誠而憂寄方深難輟紫
垣之務勉諭已伸於前詔忠勤載露於來章今征討已
停方隅稍泰克清之日雖則不遙難奪之心亦宜且抑
重此宣慰當體朕懷是推至公煩有陳謝

與吐蕃宰相尚綺心兒等書

敕吐蕃宰相尚綺心兒等論思諾悉至省表并進奉具
悉卿等才器特茂識略甚明仗義立身資忠事主上佐
贊普下康黎元以尋盟納款為謀繼好息人為請是卿
上策叶朕中心每覽表章輒用嘉歎朕與彼蕃國代為
舅甥日結恩信自論盟會頗歷歲時常欲速成以為永
好雖誠明之內彼此無疑而言約之間往復未盡今故
略收來意重示所懷想卿通明當所鑒悉河隴之地國

家舊封論州郡則其數頗多計年歲則沿來甚近既通和好悉合歸還今者捨而不言豈是無心愛惜但務早成盟約所以唯言三州則沒於彼者甚多歸於此者至少猶合推於禮讓豈假形於言詞來表云此三州非創侵襲不可割屬大唐來且此本不屬蕃豈非侵襲所得今是却歸舊管何引割屬為詞去年論與勃藏來即云覆取進旨贊普便請為定今兩般使至又云比之小務未合首而論之前後既有異同信使徒煩來去雖欲速

為盟會其如無所適從靜言二三固不在此若論和好即今各無侵軼已同一家若議修盟即須重定封疆先復三郡若三郡未復兩界未分即是未定封疆憑何以為要約彼若吝惜小事輕易遠圖未能修盟且務通好至於信使一往一來但令疎數得中足表情意不絕彼有要事即令使來此有要事亦令使往若封境之上小事意但令邊頭節度兩處計會商量則勞費之間彼此省便前般蕃使論悉吉贊至緣盟約事大須審商量

未及發遣後使雖是兩般所論只緣一事故令相待今
遣同歸在於日時亦未淹久所送鄭叔矩及路泌神枢
及男女等並已到此良用惻然厚贈遠歸深嘉來意其
劉成師原非劉闢子侄本是成都郡人已令送還本貫
其餘事目並在贊普書中卿等宜審叅量以副朕意使
迴之日可備奏聞今遣兼御史中丞李鈺及中使與迴
使同往各有少信物具如別數至宜領之秋涼卿等各
得平安好遣書指不多及

答王承宗謝洗雪及復官爵表

帝者之道蕩然無私唯推赤心以牧黔首故一夫不獲
若納之於隍一物歸誠則容之如地况卿家聯懿戚寵
自先朝祖立茂功賞延後嗣因人註誤不染疵瑕滌以
恩波煦之寵澤撫舊封而廉察六郡進新律而統制三
軍蕩穢加恩何以過此及覩來表乃見深誠言必由衷
事皆知感承家襲慶誓繼力於前修補過酬恩願指期
於後効永言爾志甚叶朕懷勉思始終用副眷矚所謝

知

與鄭綢詔

敕鄭綢省所奏邕管黃少卿及子弟等事宜具悉卿望
重中朝寄深南服誓敷惠政佇化遠人言念忠勤不忘
監寤山洞夷落易擾難安比來撫之未及其道覽卿所
奏頗合其宜歲時之間當草前弊勉於招諭以副朕心
答高郢請致仕第二表

卿有忠貞之節立於險中有清重之名鎮於朝右而能

始終有道進退有常援禮引年遺榮致政人鮮知止卿
獨能行不唯振起古風亦足激揚時俗於卿則確然難
奪在朕則情豈易忘誠鑒乃懷未允來表

與劉總詔

敕劉總卿業繼將門才兼武畧累臨軍郡悉著良能襲
以弓裘宜加旌鉞仍舉奪情之典以昭延賞之恩今授
卿起復雲麾將軍檢校工部尚書充范陽節度等使并
賜旌節官告往想宜知悉

答裴均讓中書侍郎平章事表

卿自登台輔每竭忠貞一身秉彛百度惟序致君盡力
久積股肱之勤憂國勞心微生媿理之疾暫從休告遽
獻表章所陳雖是卿心所請殊非朕意宜加調攝速就
平和以副虛懷無為固讓

答劉總謝檢校工部尚書范陽節度使表

卿幼承義訓長有令聞能遵忠孝之風不墜弓裘之業
朕所以命加異等寵冠常倫特授雙旌超登八座豈惟

延賞亦在任能將懋前修勉申後効載省章疏深鑒誠懷所謝知

與茂昭詔

敕茂昭王日興至省表陳讓檢校太尉者具悉卿文武大僚勲戚重望累展朝宗之禮足表恭敬之心况多戰伐立功彌彰勤盡言念及此每用嘉焉宜加寵榮已降新命何至謙讓仍辭舊官眷倚之懷並具前詔想宜知悉

答任廸簡讓易定節度使表

卿修文立身經武致用每誓心於忠勇常濟事以智謀
自副戎車已屬時望及分旌鉞果愜軍情況武義之師
輸忠仗順所期慰撫以就輯寧何至撫謙有茲陳讓所
進官告今却賜卿宜體朕懷即斷來表

答裴均讓宰相第三表

卿疾病已來表疏相繼雖辭乞之誠頗切而注望之意
方深所以來章久而未報然念卿勤懇之請至於再三

若心不甚安即疾難速愈是用輟樞劇之務加崇重之官稍遂優閒佇期痊復勉從爾志深抑予懷

答裴垕謝銀青光祿大夫兵部尚書表

卿自居鈞軸日獻謀猷戴君常竭其股肱憂國每形於顏色及嬰疾病益不遑安未踰四旬以至三讓撫謙秉易退之道堅懇陳難奪之詞遂抑朕心俯從卿請而七命印綬五兵尚書官秩甚崇事務稍簡就以優養冀乎和平載省表章深見誠意

與劉總詔

敕劉總康志安至省所謝陳具悉卿之先父為朕元臣
大節殊功歿而不朽宜加恩禮俾洽哀榮故命宰臣為
之撰錄卿義深報國孝重承家既感顯親之恩願竭戴
君之道遠有奏謝益用嘉之想宜知悉

與房式詔

敕房式卿以良才尹茲東洛公忠無怠聲績有聞嘉歎
之深寧忘寤寐宣城重寄深在得人藉卿政能往就綏

撫今授卿宣州刺史兼御史中丞充宣歙等州都團練
觀察處置等使并賜告身往卿宜便起赴本道勉修所
任以稱朕懷想當知悉

與盧恒卿詔

敕盧恒卿累登朝序皆著公方自領藩條益彰理行恪
恭而奉上勤儉以牧人不加寵榮何勸來者朕以擢管
漕運軍國所資其務甚殷所寄尤重以卿有忠勞之前
効幹濟之長才常簡朕心宜授此職今除卿尚書刑部

侍郎充諸道鹽鐵轉運使并賜告身往宜即赴闕庭想
當知悉

與新羅王金重熙等書

敕新羅王金重熙金獻章及僧冲虚等至省表兼進獻
及進功德并陳謝者具悉卿一方貴族累葉雄材仗忠
孝以立身資信義而為國代承爵命日慕華風師旅叶
和邊疆寧泰况又時修職貢歲奉表章進獻精珍忠勤
並至功德成就恭敬彌彰載覽謝陳益用嘉歎滄波萬

里雖隔於海東丹慊一心每馳於闕下以茲嘉尚常屬
寢興勉弘始終用副朕意今遣金獻章等歸國并有少
信物見如別錄卿母及妃并副王宰相已下各有賜物
至宜領之冬寒卿比平安好卿母比得和宜官吏僧道
將士百姓等各加存問遣書指不多及

答文武百寮嚴綬等賀御製新譯大乘本生心
地觀經序表

朕勤求道本廣挹教源以真如不二之宗助清淨得一

之化況斯經典時為大乘名理精微翻譯成就雖契心則離於文字而得意亦假於筌蹄庶使發揮因為述序卿等精通外學懇竭忠誠引經贊揚奉表稱賀再三省覽嘉歎良之

答孟簡蕭俛等賀御製新譯大乘本生心地觀經序狀

大僊經典最上法乘來自西方閱於中禁將期利益必在闡揚遂命僧徒譯其句偈兼詔卿等潤以文言昨因

披尋深得真諦悟本生不滅之義證心地無相之宗方
勤護持聊著序引永言述作猶愧聖明卿等賀陳良深
嘉尚

答元應授岳鄂觀察使謝上表

夏口重鎮屬在時賢非明肅不能理其軍非簡儉不能
阜其俗以卿有仁厚之質謇直之風累踐班行皆著名
節遂輟中憲往臨外藩知己下車深慰人望佇茲報政
用副朕懷所謝知

答李鄘授淮南節度使謝上表

卿抱兼人之才秉徇公之節每登要職悉著能名若刃
發硎投而不滯如玉在佩動必有聲朕以距淮而南人
物繁會非廉明何以貞師察俗非簡惠何以通商綏農
前勞既彰後效何遠載省來表知己下車勉副虛懷佇
觀新政所謝知

畫大羅天尊贊


歲正月十九日順宗仙駕上昇之日月也皇帝嗣位六

載每及茲晨齋居孝思明發不寐以為玄祖之教本乎
道先帝之神在乎天故畫大羅天尊像者欲以最上勝
因而成本功德也然則知之者不如念之者念之者不
如仰之者是用諦念真力虔仰尊儀命設色之工圖其
儀形命掌文之臣贊其功德達孝誠於天上致孝理於
域中斯蓋弘願發於我皇景福薦於先后稽首奉詔跪
稱贊云

維大羅兮天上天維天尊兮仙上仙高真之鑒照下界

孝敬之心達上玄每一念分以一仰感罔極分福無壅

白氏長慶集卷五十六



總校官庶吉士 臣張能照

校對官庶吉士 臣曹錫齡

膳錄監生 臣張 霖

欽定四庫全書薈要

集部

白氏長慶集卷五十七

八



臣

王杰詳校

詳校官助教臣常衍

欽定四庫全書薈要卷一萬三千九百八十七

集部

白氏長慶集卷五十七

唐白居易撰

翰林制誥四

凡六十八首

答元義請上尊號表

朕自君臨運逢休泰時歲豐稔允醜殄夷此皆宗社降
靈忠賢宣力顧惟寡德敢受鴻名卿中發懇誠上尊美
號雖屬人望難貪天功宜悉所懷勿固為請



答薛萃賀生擒李錡表

朕自嗣耿光每多惕厲念必先於除害志無忘於安人

李錡大負國恩自貽天罰師徒未動於疆場

音亦

父子俱

肆於市朝信上天之禍淫與率土而同慶省視來表深
鑒乃誠所賀知

與薛萃詔

勅薛萃楊君靖至省所陳謝具悉卿勤王之節徇公滅
私事主之誠移忠資孝苟非褒贈何以顯揚且清白之

風既自家而刑國則寵旌之澤宜因葉以流根式遵追
遠之經用表教忠之訓是為禮典煩致謝章

與嚴礪詔

勅嚴礪薛光朝至所陳謝具悉卿徇公竭誠臣節克著
揚名濟美子道有光教忠既本於義方追遠宜崇於禮
命俾優褒贈爰慰孝思秩貴冬官以表過庭之訓封榮
石窳_{居效切}用旌徙宅之賢雖示新恩允符舊典遠煩陳
謝深見懇誠

與餘慶詔

勅餘慶省所謝陳具悉卿累居衮職時謂盡忠自尹洛
師日聞報政臣節既彰於宣力子道莫大於揚名俾光
孝思爰舉禮命榮褒冢宰寵賁幽靈式是彝章豈為私
渥有煩陳謝深見誠懷

答黃裳請上尊號表

朕以薄德嗣守丕圖不敢荒寧以弘理道幸屬歲時豐
稔兇寇梟夷風雨不愆禮園丘而報本雷霆未震豐

計

切與
釁同

太社而服刑斯皆十聖降靈幽贊寡昧百辟叶德
馴致和平永惟弘名實懼虛美卿上稽祖訓下酌羣情
陳獻表章請加徽號暨于王公卿士降及耆艾緇黃咸
一乃心各三其請朕嘗以宰元化者曲成於物法天道
者從欲於人雖恤隱泣辜未臻三五之化而樂推欣戴
難違億兆之心德非稱焉讓不獲已勉從所請深愧於
懷

與從史詔

勅從史楊幹至省所奏今月七日到潞城縣降雪尺餘
魚奏耆老等詣闕請欲立碑并手疏通和劉濟本末事
宜者具悉卿分朕之憂求人瘼時降大雪豐年表祥
豈惟澤及土田將使物無疵厲休慶斯在慰望良深耆
老等遠詣闕庭請立碑記尋已允許當體誠懷以旌政
能無至陳讓知卿協比其鄰翼戴為意陳此手疏發於
血誠忠懇彌彰嘉嘆不已永言臣節何日忘之想宜知
悉

與韓臯詔

勅韓臯省所陳賀具悉鄉朕自守睿圖每思寬政慮先
禁暴念在措刑李錡負國反常阻兵干紀未勞師旅已
就誅夷卿宣力納忠秉心嫉惡遠陳慶賀深見懇誠想
宜知悉

與元衡詔

勅元衡卿立身許國竭力匡君人之具瞻予所嘉賴凋
殘是卹遠藉宣風之能利濟所資暫輟為霖之用慈和

既敷於兵後惠信當洽於言前永念忠勤豈忘寤想計
卿行邁已到西川涉遠冒寒固甚勞頓勉加綏撫以副
朕懷想宜知悉

答李扞等謝許上尊號表

朕自臨萬邦僅經三載位雖託於人上化未洽於域中
永念眇身敢當大號卿等義深宗室忠盡君親一其情
誠三有陳獻迫以人望厭于天心遂抑所懷勉從其請
固辭而事非獲已撫德而何以堪之再省謝章彌增惕

厲

答馮伉請上尊號表

朕統承大寶時屬小康伐謀而吳蜀克清示信而華夷
有截斯皆宗社垂祐天地降和非予冲人所能馴致卿
上稽十聖之訓下酌萬人之心以為不讓強名未傷於
體道屈已循物何爽於至公遂抑素懷俯從衆望雖鴻
名未稱每勞躋地之心而人欲下從即爽法天之德勉
依勤請良用愧懷

答長安萬年兩縣百姓耆壽等謝許上尊號表

朕每念雍熙慙未及於億兆永言徽號讓已至於二三而文武具寮縉黃庶老懇陳誠款明引訓謨開予以天地無私之心起予以聖宗不易之訓以大道者無求於物物尊而不辭至公者非欲其名名立而不讓迫於固然之禮不得已而許之卿等誠至感通義深欣戴再煩陳謝益用愧懷

答元素謝上表

御用兼文武識合變通輟綱領於中朝授麾幢於外閫
吏能足以惠物將畧足以董戎人望所歸予心是賴知
卿已到本鎮當慰疲人深藉撫綏之方以安凋弊之俗
日期報政歲望成功勉勤所圖用副朕意

答韓臯請上尊號表

銷沴致和幸逢昌運加名建號豈稱眇身而文武具寮
黎獻庶老引古今之明訓陳億兆之懇誠謂德有所歸
謳謌不可以苟讓謂功有所獻徽號不可以固辭遂抑

中懷俯從衆望庶增修乎茂實冀克副於鴻名卿發誠
自中歸美於上勉依所請彌愧於心

答馮伉謝許上尊號表

朕以眇身嗣於丕業心雖勞於惕厲化未及於雍熙永
惟強名實懼虛美上自一二元老下及億兆黎人大洽
詢謀明徵典訓增予以巍巍之號感予以顒顒之誠既
迫所懷俯從所請卿義深奉上志切戴君再省謝陳彌
增愧惕

與顏証詔

勅顏証戴安至省所賀及謝王國清充五嶺監軍具悉
卿職在撫綏任兼備禦公勤夙著聞望日彰言念於懷
豈忘寤寐乾象昭感壽星垂文與時相膺有道則見顧
慙非德何以當之卿戎旅事殷宜有監領蓋為常例煩
至謝陳想宜知悉

與從史詔

勅從史省所陳謝追贈亡母并舉薦韋悅具悉卿推誠

奉國積慶成家既彰盡節之忠宜洽流根之澤雖祿難
逮養已閔靈於九原而孝在顯親宜旌賢於三徙俾崇
封贈以極哀榮韋悅既有才能又所諳委卿即發遣令
赴闕庭卿之忠誠朕所識察豈待陳露然後知之載覽
來章益嘉懇切想宜知悉

與李安詔

勅李安省所陳謝具悉卿朕纂承鴻業司牧蒼生僅致
小康未臻大化實慙薄德未稱崇名而華夷兆人內外

羣后屢有勤請難於固違卿遠獻表章明徵典訓納忠
於上歸美於君勉從懇誠良用愧悵儲貳者上繼宗祖
下貞邦家心豈暫忘事或未暇尚阻來請當體所懷

與高固詔

勅高固卿奉國戴君必竭忠節統戎護塞克著勲勞自
領藩垣委之心膂忠慤之志久而益彰欽歎在懷何嘗
暫忘以卿一從軍旅多在邊陲歲月積深勤勞滋久所
宜出入中外周旋寵光今授卿檢校尚書右僕射御史

大夫兼右羽林軍統軍以端揆之崇兼環衛之帥遂卿望闕之戀表朕念功之心仍賜卿官告卿宜即赴闕庭想宜知悉

祭故贈婕妤孟氏文

維元和二年歲次丁亥十二月甲寅朔十九日壬申皇帝遣某官某以庶羞之奠致祭于故婕妤之靈曰惟爾和順積中柔明奉上動靜合肅雖之體進退得婉孌之儀選自良家備茲內職修令顏以顧德蘭幽有香守明

節而保身玉潔無玷方資懿範以茂嘉猷彼美有聞于
何不淑遽茲淪逝深用惻傷既卜日晨爰申奠醑以爾
有班氏之明智故贈以婕妤以爾有宓妃之姿容故葬
於洛浦魂兮不昧歆此誠懷尚饗

洛浦原在
長安界

季冬薦獻太清宮詞文

維元和二年歲次丁亥十二月甲寅朔二十六日巳卯
嗣皇帝臣稽首大聖祖高上大道金闕玄天元皇大帝
伏以今年司天臺奏正月三日祀上帝于南郊佳氣充

塞四方溫潤祥風微起廬州申連理樹一株彰義軍節
度使進白鳥一鄭滑觀察使奏瑞麥五科司天臺奏六
月五日夜鎮星見河陽節度使進白雀一荊南節度使
申連理樹一本山南西道觀察使申嘉祚一枚司天臺
奏六月十三日夜老人星見河南府申芝草兩莖司天
臺奏冬至日佳氣充塞瑞雪祁寒者臣嗣承丕圖肅恭
寅畏祖宗垂慶佳氣薦臻虔奉禎祥伏深祇惕今時惟
玄律節及季冬仰薦明誠敬率恒典謹遣攝太尉司徒

平章事杜佑薦獻以聞謹詞

與茂昭詔

勅茂昭盧校至省所奏請上尊號及建諸闡賀誅李錡
并進馬者具悉卿朕以寡德祇嗣丕圖雖致小康豈稱
大號迫於人望遂抑予懷永惟強名實愧虛受儲貳者
上繼宗祖下負邦家心非暫忘事或未暇尚阻來請宜
體所懷李錡包藏亂心奮發兇德不勞征討自就誅夷
想卿忠誠倍以為慰所進馬馴良可尚服御且閒取其

戀主之心足表為臣之節再三省覽嘉歎久之想宜知悉

答百寮謝許追遊集宴表

在昔哲王居於人上推其憂樂與衆共之頃屬三兇薦興二載連獲凡百有位咸一其心誠念嘉謀共致昭泰今四表無事三農有年思與群情同其具慶是宜削苛察之前弊煦寬裕之新恩仁及下而啓迪歡心澤先奏而導迎和氣昨逢多故主憂且使臣勞今致小康上安

則宜下樂庶欲解人之愠粗伸推已之恩豈曰殊私煩
於陳謝

答李扞謝許遊宴表

朕自御萬方僅經三載運逢休泰俗漸和平當朝野無
虞之時見君臣相遇之樂是故去滋彰之化弘優貸之
恩近自宗親下及士庶賜其宴衍遂以優遊蓋以已之
所安思與人之共樂雖夕惕而若厲每戒志於無荒賜
春遊以發生宜助時而有慶卿等榮崇宗寺恩重本枝

省所謝陳彌嘉誠懇

答劉濟詔

勅劉濟省所奏茂昭送卿管內百姓殷進能等七人奏
前後事由具悉卿為國大臣與君同體寡而得衆忠以
忘身每循公而減私能虛懷以容物與茂昭疆場音之
事小有違言曲直是非朕已明辯卿外崇藩翰內贊謨猷
念屈已以為心或難容忍思戴君而是力宜務叶和
勉卿寬裕之懷助朕含弘之化想宜知悉

與柳晟詔

勅柳晟卜英琦至省所奏慶雲并進圖者具悉昌運將
開祥符先見發自和氣聚為卿雲捧日而五色相宣垂
天而萬物咸覩斯為嘉瑞宜契昇平朕方致小康未臻
大化受茲方貺祇惕良深卿以誠事君推美奉上獻輪
囿於圖畫陳懇款於表章披閱再三彌增嘉嘆

答薛萃謝授浙東觀察使表

卿久踐吏途累聞能政及居藩鎮尤見忠勤訓導而羣

黎向方廉察而列郡承式實嘉乃績每簡予心宜遷雄
劇之藩以廣循良之化勉於為理副朕所懷所謝知

上元日嘆道文

道本無象功成強名生一氣之先為萬物之母吹煦寒
暑陰陽節而歲功成輔相乾坤上下交而生物遂故能
阜蕃動植啓迪雍熙邦家保安夷夏咸若今以時殷獻
歲節及上元女道士某等奉為皇帝焚香行道敬修功
德伏願聲聞赫極丕降玄休大庇羣生永康四海流光

重慶億萬斯年

畫大羅天尊讚文

道用無窮統之者大聖神化不測感之者至誠非圖像
無以示儀形非供養無以展嚴敬故一念一禮而福隨
之畫大羅天尊者奉為順宗至德大聖大安孝皇帝忌
辰之所造也皇帝祖玄元之風嗣清淨之理志在善繼
心惟孝思申命工人彰施繪事粹容儼若真相炳焉憑
志誠而上通垂景福而下濟詞臣奉詔恭為讚云

真通之象孝感之心率土瞻仰在天照臨蓄為精誠發為圖畫如從大羅應念而下？

答朱仕明賀冊尊號及恩赦表

朕以寡德嗣承睿圖俯從衆誠勉受鴻稱慶之大者豈在予一人推而廣之宜及爾萬姓爰因受冊之禮遂施作解之恩俾與羣生同斯大慶卿盡忠訓旅推美奉君省茲賀陳深見誠至

祭咸安公主文

維元和三年歲次戊子三月癸未某日皇帝遣某官某

以庶羞之奠致祭於故咸安大長公主觀濬毗伽可敦

之靈曰惟姑柔明立性溫惠保身靜修德容動中規度

組

摠五切 詳倫

之訓既習於公宮湯沐之封遂開於國

邑及禮從出降義重和親承渥澤於三朝播芳猷於九

姓遠修好信既申協比之姻殊俗保和實賴肅雍之德

方憑福履以茂輝榮宜降永年遽歸長夜悲深訃告寵

極哀榮爰命使臣往申奠禮故鄉不返烏孫之曲空傳

歸路雖遙青塚之魂可復遠陳薄酌庶鑒悲懷嗚呼尚饗

與仕明詔

卿久鎮邊防初膺閫寄式旌勤効俾洽恩榮褒德念功
故進封以示寵忠誠亮節宜因實而錫名既表新恩亦
惟舊典今改封卿丹陽郡王仍改名忠亮勉勤乃事以
副所懷想宜知悉

與崇文詔

勅宗文段良玘至省所謝亡妻邑號具悉卿有濟時之
勲寵居袞職士政承積善之慶列在王官俾洽恩光故
加褒贈念梧桐之早落不及夫榮追茆苴之遺芳宜從
予貴式崇寵命以賁幽靈省茲謝章良用嘉歎

祭張敬則文

維元和三年歲次戊子七月辛巳朔二十七日丁未皇
帝遣某官某以清酌之奠致祭于故鳳翔節度使贈某
官張敬則之靈惟爾挺武毅之質負將帥之才名以忠

聞位由勤致自膺閫職益茂勲猷惠葺疲氓威吞黠虜
一方膏雨千里長城繼博望之功勞能恢代業傳子房
之籌略不墜家聲方誓山河遽捐館舍逝川無捨遠日
有時微績空存書旗常而播美音容不見聽輦鼓而增
思永念忠勤彌深軫悼往陳遣奠庶鑒悲懷嗚呼尚饗

與希朝詔

勅希朝劉忠謹至省所奏沙陀突厥共一千八百七十
人并駝馬器械歸投事宜具悉卿以將帥之才鎮華夷

之要憂勞為國忠勇忘家聲動寇戎塵清封畧哭厥等
嚮風輸款率屬來賓雖慕我懷柔遠無不至亦因卿威
惠導之使來念其歸投宜有優賜今賜衣服及匹段等
自首領以下卿宜等第給付其部落家口等遠經跋涉
宜稍安存以勸歸心用副注意

與元衡詔

勅元衡省所奏當管南界外生蠻東凌六部落大鬼主
苴春等以所管子弟百姓等二千餘戶請內屬黎州并

奏南路蕃界消息者具悉卿以文武之才兼將相之任
仁和下布黎庶獲安威惠旁流蠻夷率附勲勤斯著倚
賴彌深欽矚之懷豈忘寤寐生蠻部落苴春等久阻聲
教遂此歸投願屬黎州請通縣道勉於撫慰以勸將來
所奏蕃界事宜具已知悉戎虜雖聞喪敗封疆不可無
虞亦宜隄防用副憂矚

與陸庶詔

勅陸庶省所奏當管新開福建陸路四百餘里者具悉

卿望重周行寄分越徼嘉聞素著茂政累彰況勤可使
人智能創物廢驚波之路開砥石之途捨舊謀新以夷
易險財力不費商旅斯通惠既及人動非擾下績用可
尚欽嘆良深

答盧虔謝賜男從史德政碑文并移貫屬京兆
表

卿男從史為國重臣自領大藩厥有成績公忠茂著政
理殊尤勒石所以表勲賜文所以褒德惟功是念有善

必旌是國舊章非予私渥昨又請移鄉貫願隸京邑家聲益振臣節逾章雖清望標門崇冠山東之族而丹心戀闕恥為關外之人載省懇誠彌深嘉嘆所謝知

與宗儒詔

敕宗儒卿邦家楨幹班列羽儀嘗作股肱弼諧無怠及司管籥鎮靜有方欽重之懷寢興不捨春宮之長非賢不居既簡朕心亦符人望今授卿禮部尚書并賜官誥往除餘慶東都留守卿宜便與交割即赴上都想宜知

悉

與希朝詔

敕希朝省所奏党項歸投事具悉卿邊隅寄重聞外事
繁威行而軍聲外揚信及而戎心內附動皆展効進必
盡忠勞績彌彰倚望尤切党項拓跋忠敬等頃雖為盜
今已經恩懼而歸投情可容恕許其後効以補前非卿
宜安存無使疑懼其磨梅部落等尚能繼至亦許自新
宜加招諭令知朕意

與韓弘詔

勅韓弘任光輔至省所陳請具悉卿文武全畧邦家重臣自居大藩厥有成績輯寧百姓嚴整三軍使予無憂惟爾之力省茲章奏懇願朝宗誠嘉深衷難遂勤請朕以梁宋之地水陸要衝運路咽喉王室藩屏人疲易散非卿之惠不能安師衆難和非卿之威不能戢今衆方悅附人又知歸鎮撫之間事難暫輟雖戀深雙闕積十年而頗勞然倚為長城捨一日而不可勉卿忠力布朕

腹心宜體所懷卽斷來表

答杜佑謝男師損除工部郎中表

卿道贊謨猷功成輔弼師損克承訓義雅有令名豈惟
賞延兼以能選班行久次頗積功勤郎署稍遷未為渥
澤省茲章奏深見懇誠所謝知

與嚴礪詔

勅嚴礪省所奏進蒼角鷹六聯具悉卿任重列藩寄兼
外間事皆奉上動必竭誠時屬勁秋致茲鷙鳥調習成

性進獻及時取其效用之能足表盡忠之節

與韓弘詔

勅韓弘卿苦心奉國極慮撫人惠彼一方於茲十載歷
展勤王之効累陳戀闕之誠才以任彰節因事著不加
殊寵何表成功夫外擁旌旄爪牙之任重內參台衮股
肱之寄深以爾一心授茲二柄永言倚賴當副誠懷今
除卿同中書門下平章事依前宣武軍節度等使餘並
如故并賜官告往想宜知悉

答王錡陳讓淮南節度使表

卿自領大藩累彰殊效惠安百姓表正一方雖戀闕誠
深然殿邦寄切既執圭而肆覲宜返旆而勞旋况淮海
要衝旌旄重任永言共理已有成功方注意於撫綏何
澁誠而陳讓難允來請宜體所懷

答韓弘讓同平章事表

致理之道審官為先以卿有文武之才故授卿以將相
之任所冀外為藩翰張爪牙之威內贊謨猷宣股肱之

力僉諧允屬衆望攸歸方注意於安危何執謙而陳讓
所進官告今却賜御無或再辭即斷來表

畫大羅天尊讚文

唐元和己丑歲四月十四日畫大羅天尊一軀成奉為
睿聖文武皇帝降誕之辰所造惟歲之春惟月之望誕
千年一聖之始降百祥萬壽之初電繞樞而夜明雷出
震而時泰皇帝孝敬寅畏憂勤勞謙以謂無疆之休雖
肇自於元聖莫大之慶思廣被於羣生爰命國工俾陳

繪事真相儼若玄風穆如疑從大羅感聖而降至誠上
通於一德景福旁濟於萬靈休命耿光自茲無極詞臣
承詔恭為贊曰

大羅天兮高不測浩無倪兮杳無極中有聖兮無上尊
惟玄德兮可升聞圖相好兮仰高真誠上感兮福下臻
俾百祥兮與萬壽配聖日兮而長新

答韓弘再讓平章事表

將相兼委實難其人非其德不可謬承當其才不在懇

讓朕非虛授卿勿固辭宜斷來章即奉成命已具前詔
當體朕懷

畫元始天尊讚

并序

元者諸天之先始者萬靈之母混而成一強以為名至
哉無上尊得以是為號正月二十有三日德宗神武孝
文皇帝在九仙之月遇八音之日也皇帝教弘玄訓業
奉真宗承文祖之貽謀申孝孫之誠敬以謂元始天尊
者真儀不遠隨相而生神用無方應念而至故命設繪

素展儀刑五彩彰施七寶嚴飾所以表當宁之瞻仰感
在天之聖神通玄應於希夷集靈祐於盼蠻許兩切詞臣
承命跪唱讚云

玄聖何在天上天欲往從之宵無緣命工設色五彩宣
忽如真相見於前聖應聖兮玄又玄薦百福兮垂萬年

北齊驃騎大將軍高敖曹讚

并序奉
勅撰

高昂字敖曹渤海蓆

他歷切

人也姿體甚異膽力過人累

經戰伐皆著功績官至驃騎大將軍儀同三司冀州刺

史其勇敢忠壯冠於一時時稱為名將後竟以攻戰死於王事年四十八贈太尉諡曰忠武贊曰

教曹之容好配子羽生揚勲烈死諡忠武武不顧身忠不忘主誠哉選士無以貌取

與驃國王雍羗書

勅驃國王雍羗卿性弘毅勇代濟貞良訓撫師徒鎮寧邦部欽承王化思奉朝章得睦鄰之善謀秉事大之明義又令愛子遠赴闕庭萬里納忠一心稟命誠信彌著

嘉想益深今授卿檢校太常卿并卿男舒難陀那及元
佐摩訶思那等二人亦各授官告往至宜領之此所以
表卿勲勤申朕恩禮敬受新命永為外臣勉弘令圖以
副遐矚今有少信物具如別錄想宜知悉也冬寒卿比
平安官吏百姓等並存問之遣書指不多及

與季安詔

敕季安劉清潭至省所奏貝州宗城縣百姓劉弘為母
病割股充祭事宜具悉卿任重弼諧寄深鎮守勤撫綏

之政贊變理之功至使部人忘身展孝雖因心有感誠
化我之時風而率下可知足表卿之理行省茲陳奏欽
嘆良深

答杜兼謝上河南少尹知府事表

三川封畿實重其任貳職綱紀亦難其人卿素懷器能
累著聲績亞理以明慎選專領以展長才知己下車當
親綏撫佇聞報政用副憂勤所謝知

代忠亮答吐蕃東道節度使論結都離等書

奉敕

撰

大唐四鎮北庭行軍涇原等州節度使檢校工部尚書
魚御史大夫丹陽郡王朱忠亮致書大藩東道節度使
論公都監軍使論公麾下專使辱問悚慰良深國家與
吐蕃代為舅甥日修鄰好雖曰兩國有同一家至於封
疆尤貴和叶忽枉來問稍乖素誠雖有過言敢以衷告
來書云頻見燒草何使如然者至如時警邊防歲焚宿
草蓋是每年常事何忽今日形言况牛馬因風猶出疆

以相及草木延火縱近境而何傷遽懷異端未敢聞命
又云去年忽生異見近界築城者且國雖通好軍不徹
警近邊修緝彼此尋常況城是漢城地非蕃地豈乖通
理何致深疑靜言思之誰生異見頃當報牒彼已息訟
今又再言寧無慙德又云皇天無親有德即輔者皇帝
君臨萬方迨及四載道光日月德動乾坤南北東西化
無不及若非皇天輔德明神福仁北虜何為歸明南蠻
何為慕化風雨何因大順歲時何因屢豐則神助天親可

明驗矣彼若無故生疑無端結怨但思小利不務遠圖
則咎孽之生恐不在此永言取笑却請三思又云漢之
臣下頗有叛逆者近以吳蜀小寇暫肆猖狂未及討除
尋以殄滅皇威不露妖沴自清豈假彼蕃遠思傍助忠
亮謬蒙恩渥叨在藩垣恭守邊隅幸鄰封壤縱未能為
漢名將亦不可謂秦無人輒獻直言以祛深惑願推誠
信同保始終各勉令圖以求多福歲暮嚴寒惟所履安
勝遠垂惠貺愧佩殊深今因押衙迴亦有少答信具如

別紙恕輕尠也不具忠亮敬白

與南詔清平官書

敕南詔清平官段諾哭李附覽爨何棟尹輔首段谷普
李异傍鄭蠻利等段史倚至知異牟尋喪逝朕以義重
君臣情深軫悼卿等哀慕所切當何可任又知閭勸繼
業撫人輸誠奉教蒸黎咸乂封部獲安皆是卿等同竭
忠謀佐成休績永言及此嘉慰良深勉終令圖以嗣遐
矚今遣諫議大夫兼御史中丞段平仲持節冊命勸

想當悉之卿等各有所信物具如別錄至宜領也春寒卿等各得平安好遣書指不多及

答王鶚賀賑恤江淮德音表

水旱流行江淮艱食朕明申詔旨親遣使臣蠲其逋租賑以公廩爰與利物之利用表憂人之憂庶俾疲氓均霑惠澤卿克勤乃職共理為心省茲賀陳深見誠意

與茂昭詔

勅茂昭盧校至省所陳奏具悉卿翼戴君親出入將相

久專戎閫累覲王庭忠勞必竭其智謀誠懇每形於章表近者志在憂國慮及安邊請率精兵親防黠虜朕以卿當管軍鎮寄重事殷實藉撫綏用安封部雖未允所請而深嘉乃誠今又密奏恒州具申事體曲盡忠勤之節備知丹赤之心言念再三發於嗟嘆眷重之至併在予懷想宜知悉

與潘孟陽詔

敕孟陽卿夙懷才畧早振聲猷歷踐班行累彰績効自

守關輔克舉藩條惠及蒸黎威行軍鎮永言所任未展
其能朕以東川蜀門重鎮契承軍後雄壓險中思得忠
勤之臣撫此凋殘之俗量才注意無以易卿今授卿劍
南東川節度觀察使并賜官告往想宜知悉

答宰相杜佑等賀德音表

古先聖王託于人上與百姓同其欲與天下共其憂唯
推是心可底於道朕臨御萬國迨茲五年惕厲之懷雖
勤於夙夜愆伏之候猶害於歲時思草契以救災在濟

人而損已是用欽刑緩死責已卹貧罷郡國之貢珍省
宮廩之煩費延春令而布仁行惠先南風而解愠阜財
庶憑歡心以召和氣卿等或匪躬獻替或悉力弼諧啓
沃之間已申霖雨之用變理之際佇見陰陽之和各宜
勉之以輔予理所賀知

答宗正卿李詞等賀德音表

朕統承鴻緒子育蒼生累歲有秋今春不雨在陰陽之
數雖有盈虛為父子之心敢忘惻隱俾除人弊以盪歲

災卿等任重宗卿恩連屬籍省茲陳賀深見忠誠

答將軍方元蕩等賀德音表

朕以時陽舛候春澤愆期思備旱之方無如貶省務勤天之德莫若精誠是以修已卹人去煩節用冀答天戒以致時和卿志竭邦家職修軍衛省茲表章深用嘉之所賀知

與迴鶻可汗書

皇帝敬問迴鶻可汗夏熱想比佳適可汗有雄武之姿

英果之畧統制諸部君長一方纂承前修繼守舊好故
得邑落蕃盛士馬精強連挫西戎永藩中夏況嚮風之
義每勤於朝聘事大之敬常見於表章動皆由衷言必
合禮朕所以深嘉忠款遐想風規至於寢興不忘嘆矚
勉弘令德用副誠懷達覽將軍等至省表其馬數共六
千五百匹據所到印納馬都二萬匹都計馬價絹五十
萬匹緣近歲以來或有水旱軍國之用不免闕供今數
內且方圓支二十五萬匹分付達覽將軍便令歸國仍

遣中使送至界首雖都數未得盡足然來使且免稽留

貴副所須當悉此意頃者所約馬數蓋欲事可久長何
者付絹少則彼意不充納馬多則此力致歟馬數漸廣
則欠價漸多以斯商量宜有定約彼此為便理甚昭然
況與可汗禮在往來義存終始親鄰既通於累代恩好
益厚於往時所以萬里推誠期於一言見信遠思明智
固體朕心其東都太原置寺此令人勾當事緣功德理
合精嚴又有彼國師僧不必更勞人檢校其見撙拓勿

施鄔達于等今並放歸所令帝德將軍安慶雲供養師
僧請住外宅又令骨都祿將軍充檢校功德使其安立
請隨般次放歸本國者並依來奏想宜知悉今賜少物
具如別錄內外宰相及判官摩尼師等並各有賜物至
宜准數分付內外宰相官吏師僧等並存問之遺書指
不多及

與韋丹詔

敕韋丹竇從直至省所陳賀并奏江饒等四州旱損其

所欠供軍留州錢米等並已放免又奏權減俸及修造
陂堰并勸課種蒔粟麥等事宜具悉朕頃緣時旱慮害
農功雖推咎已之心敢望動天之德而未逾浹日膏澤
霈然仰荷玄休俯增祇惕卿喜深稱慶忠切分憂既覽
賀陳兼詳奏請至如蠲逋以卹人隱減俸以濟軍須抑
末業而移風務茲菽麥防旱年而歛雨修利陂塘皆合
其宜並依所奏非卿公勤奉上仁惻發中則共理之心
不能至此再三興歎一二難申勉於始終以副朕意想

宜知悉

與從史詔

敕從史史澣至省所陳謝具悉卿亡父早踐班榮久著
偉績永言褒贈自叶典常况卿孝友承家勤勞事國念
茲忠節皆稟義方將慰匪莪之心宜流自葉之澤豈為
殊渥頻至謝章

答宰相杜佑等賀德音表

朕以春候發生歲功資始順陽和而布政賑貧乏而勸

農載念罪人因除弊事隨其所利施以為恩富庶之端
實漸於此卿等義敦宗戚誠竭君親省茲賀陳用增嘉
歎

與孫璿詔

敕孫璿劉德惠至省所進隴右地圖兼進戰車陣圖車
樣及奏陳收復河湟事宜者具悉卿尹茲右輔固乃西
疆創制戎車繕修軍實思收故地誓立殊勲載覽陣圖
兼詳所奏誠得開邊之畧益加報國之心斯謂盡忠彌

增注意眷言所至無忘於懷

與李良僅詔

敕李良僅卿久在軍門習知邊事居常恭恪動必忠勤
眷乃才良可分憂寄今授卿延州刺史兼安塞軍使并
賜官告往延州既兼軍鎮且雜蕃戎防遏撫綏兩須得
所宜勉所仕用副朕懷

答京兆府二十四縣耆壽謝賑貸表

朕勤求人隱恤卹農功念播植之時必資首種慮懸磬

之日多乏見糧將便公私宜從歛散卿等名登庶老業
守先疇各勉農人以副朕意所謝知

白氏長慶集卷五十七